

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

द्वितीयकाण्डे पञ्चमः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Contents

- 2 कृष्ण यजुर्वेदीय तैत्तिरीय संहितायं पद पाठे द्वितीयं काण्डं..3**
- 2.5 द्वितीयकाण्डे पञ्चमः प्रश्नः – इष्टिविधानं.....3**

ओं नमः परमात्मने, श्री महागणपतये नमः, श्री गुरुभ्यो नमः

हरिःओं

2 कृष्ण यजुर्वेदीय तैत्तिरीय संहितायं

पद पाठे द्वितीयं काण्डं

2.5 द्वितीयकाण्डे पञ्चमः प्रश्नः – इष्टिविधानं

2.5.1.1

वि॒श्वरू॒पो वै त्वाष्ट्रः॑ पु॒रोहि॑तो दे॒वाना॑मासीत् स्व॒स्रीयोऽसु॑राणां
तस्य॑ त्रीणि॑ शी॒र्षा॒ण्यास॑न्थ्-सोम॒पान॑ꣳ सु॒रापान॑-मन्ना॒दनꣳ
स प्र॒त्यक्षं॑ दे॒वेभ्यो॑ भा॒गम॑वदत् परो॒क्षम॑सुरेभ्यः सर्व॑स्मै वै प्र॒त्यक्षं॑
भा॒गं व॑दन्ति यस्मा॑ ए॒व परो॒क्षं व॑दन्ति तस्य॑ भा॒ग उ॑दितस्तस्मादिन्द्रो॑
ऽबि॒भेदी॑दृङ् वै रा॒ष्ट्रं वि॑ पर्यावर्तयतीति॑ तस्य॑ वज्र॒मादा॑य
शी॒र्षा॒ण्यच्छि॑नद्यथ् सोम॒पान॑ - [] 1

2.5.1.1 - Padam

वि॒श्वरू॒प इति॑ वि॒श्व – रू॒पः । वै । त्वाष्ट्रः । पु॒रोहि॑त इति॑
पु॒रः-हि॑तः । दे॒वाना॑म् । आ॒सीत् । स्व॒स्रीयः॑ । अ॒सुरा॑णाम् । तस्य॑ ।
त्रीणि॑ । शी॒र्षाणि॑ । आ॒सन् । सोम॑पा॒नमि॑ति सोम – पा॒नम् ।
सु॒रापा॑नमि॒ति सु॒रा – पा॒नम् । अ॒न्नाद॑नमित्य॒न्न – अ॑दनम् । सः ।
प्र॒त्यक्ष॑मि॒ति प्र॒ति – अ॒क्षम् । दे॒वैभ्यः॑ । भा॒गम् । अ॒वद॑त् ।
प॒रोक्ष॑मि॒ति प॒रः – अ॒क्षम् । अ॒सुरे॑भ्यः । स॒र्वस्मै॑ । वै । प्र॒त्यक्ष॑मि॒ति
प्र॒ति – अ॒क्षम् । भा॒गम् । व॒दन्ति॑ । यस्मै॑ । ए॒व । प॒रोक्ष॑मि॒ति
प॒रः – अ॒क्षम् । व॒दन्ति॑ । तस्य॑ । भा॒गः । उ॒दितः॑ । तस्मा॑त् । इन्द्रः॑ ।
अ॒भिभे॑त् । ई॒दृङ् । वै । रा॒ष्ट्रम् । वी॒ति । प॒र्याव॑र्तयतीति॑
प॒रि – आ॑वर्तयति । इति॑ । तस्य॑ । व॒ज्रम् । आ॒दाये॑त्या – दा॒य ।
शी॒र्षाणि॑ । अ॒च्छि॑नत् । यत् । सोम॑पा॒नमि॑ति सोम-पा॒नम् । 1 (50)

2.5.1.2

-मा॒सीथ् स क॑पिज्ज॒लो ऽभ॑वत्यथ् सु॒रापा॑नं स क॒लवि॑ङ्को
यद॒न्नाद॑नं स ति॒त्तिरि॑स्तस्याज्ज॒लिना॑ ब्रह्म॒हत्या॑मुपा॒गृह्णा॑त् तां

सँव॑त्स॒रम॑बि॒भस्तं॑ भू॒तान्य॑भ्य॒क्रो॒शन् ब्र॑ह्म॒हन्नि॑ति स
पृ॒थि॒वीमु॑पासीद॒दस्यै॑ ब्र॒ह्म॒ह॒त्यायै॑ तृ॒तीयं॑ प्र॒ति गृ॑हाणेति साऽब्र॒वीद्व॑रं वृ॒णै
खा॒तात् प॑राभविष्यन्ती म॒न्ये ततो॑ मा प॒रा भू॒वमि॑ति॒पुरा ते॑-[] 2

2.5.1.2 - Padam

आसी॑त् । सः । क॒पि॒ञ्ज॒लः । अ॒भव॑त् । यत् । सु॒रापा॑नमि॒ति
सु॒रा – पा॑नम् । सः । क॒ल॒वि॒ङ्कः । यत् । अ॒न्ना॒द॒नमि॑त्य॒न्न-अ॑द॒नम् ।
सः । ति॒त्ति॒रिः । तस्य॑ । अ॒ञ्ज॒लि॒ना । ब्र॒ह्म॒ह॒त्यामि॑ति ब्र॒ह्म-ह॒त्याम् ।
उ॒पेति॑ । अ॒गृ॒ह्णात् । ताम् । सँव॑त्स॒रमि॑ति सं – व॒त्स॒रम् । अ॒बि॒भः ।
तम् । भू॒तानि॑ । अ॒भीति॑ । अ॒क्रो॒शन् । ब्र॒ह्म॒ह॒न्नि॑ति ब्र॒ह्म – ह॒न् ।
इति॑ । सः । पृ॒थि॒वीम् । उ॒पेति॑ । अ॒सी॒दत् । अ॒स्यै । ब्र॒ह्म॒ह॒त्याया॑
इति॑ ब्र॒ह्म – ह॒त्यायै॑ । तृ॒तीयम् । प्र॒तीति॑ । गृ॒हा॒ण । इति॑ । सा ।
अ॒ब्र॒वीत् । व॒रम् । वृ॒णै । खा॒तात् । प॑राभविष्यन्तीति
प॒रा – भ॒वि॒ष्यन्ती॑ । म॒न्ये । ततो॑ । मा । प॒रेति॑ । भू॒वम् । इति॑ ।
पु॒रा । ते॑ । 2 (50)

2.5.1.3

सँव॑थ्स॒राद॑पि॒ रो॒हादि॑त्य॒ब्रवी॑त् तस्मा॑त् पु॒रा सँव॑थ्स॒रात् पृ॒थि॒व्यै
खा॒तम॑पि॒ रो॒हति॑ वा॒रेवृ॑त् ह्य॒स्यै तृ॒तीयं॑ ब्र॒ह्मह॑त्यायै प्र॒त्य॒गृ॒ह्णात्
तथ् स्व॑कृ॒तमि॑रिणम॒भवत् तस्मा॑दाहि॒ताग्निः॑ श्र॒द्धादे॑वः स्व॑कृ॒त इ॒रि॒णो
ना॒व स्ये॑द्-ब्र॒ह्मह॑त्यायै ह्योष॒ वर्णः॑ स वन॒स्पती॑नुपासीद॒स्यै ब्र॒ह्मह॑त्यायै
तृ॒तीयं॑ प्र॒ति गृ॒ह्णी॑तेति॒ तेऽब्रु॑वन् वरं॑ वृ॒णाम॑है वृ॒क्णात् - [] 3

2.5.1.3 - Padam

सँव॑थ्स॒रादि॑ति सं - व॒थ्स॒रात् । अ॒पी॒ति । रो॒हात् । इति॑ । अ॒ब्रवी॑त् ।
तस्मा॑त् । पु॒रा । सँव॑थ्स॒रादि॑ति सं - व॒थ्स॒रात् । पृ॒थि॒व्यै ।
खा॒तम् । अ॒पी॒ति । रो॒हति॑ । वा॒रेवृ॑तमि॒ति वा॒रे - वृ॒तम् । हि ।
अ॒स्यै । तृ॒तीयम् । ब्र॒ह्मह॑त्याया इति॑ ब्र॒ह्म - ह॒त्यायै॑ । प्र॒तीति॑ ।
अ॒गृ॒ह्णात् । तत् । स्व॑कृ॒तमि॑ति स्व - कृ॒तम् । इ॒रि॒णम् । अ॒भवत् ।
तस्मा॑त् । आ॒हि॒ताग्नि॑रि॒त्याहि॑त - अ॒ग्निः । श्र॒द्धादे॑व इति॑
श्र॒द्धा - दे॒वः । स्व॑कृ॒त इति॑ स्व - कृ॒ते । इ॒रि॒णो । न । अ॒वेति॑ ।

स्येत् । ब्रह्महत्याया इति ब्रह्म – हत्यायै । हि । एषः । वर्णः । सः ।
 वनस्पतीन् । उपैति । असीदत् । अस्यै । ब्रह्महत्याया इति
 ब्रह्म – हत्यायै । तृतीयम् । प्रतीति । गृहीत । इति । ते । अब्रुवन् ।
 ॥
 वरम् । वृणामहे । वृक्णात् । 3 (50)

2.5.1.4

पराभविष्यन्तो मन्यामहे ततो मा परा भूमेत्याव्रश्चनाद्वो भूयाँस
 उत्तिष्ठानित्यब्रवीत् तस्मादाव्रश्चनाद्-वृक्षाणां भूयाँस उत्तिष्ठन्ति
 वारेवृत७ ह्येषां तृतीयं ब्रह्महत्यायै प्रत्यगृणहन्थ्स निर्यासो ऽभवत्
 तस्मान्निर्यासस्य नाऽऽश्यं ब्रह्महत्यायै ह्येष वर्णोऽथो खलु य एव
 लोहितो यो वाऽऽव्रश्चनान्निर्येषति तस्य नाऽऽश्यं – [] 4

2.5.1.4 - Padam

पराभविष्यन्त इति परा-भविष्यन्तः । मन्यामहे । ततः । मा । परैति ।
 भूम । इति । आव्रश्चनादित्या-व्रश्चनात् । वः । भूयाँसः । उदिति ।
 तिष्ठान् । इति । अब्रवीत् । तस्मात् । आव्रश्चनादित्या – व्रश्चनात् ।
 वृक्षाणाम् । भूयाँसः । उदिति । तिष्ठन्ति ।

वारै॑वृ॒तमि॒ति॑ वारै॑ – वृ॒तम् । हि । ए॒षाम् । तृ॒तीयम् । ब्र॒ह्म॒ह॒त्याया॑
 इति॑ ब्र॒ह्म – ह॒त्यायै॑ । प्र॒तीति॑ । अ॒गृ॒ह्णन् । सः । नि॒र्या॒स इति॑
 निः – या॒सः । अ॒भ॒वत् । तस्मा॑त् । नि॒र्या॒सस्येति॑ निः – या॒सस्य॑ ।
 न । आ॒श्रय॑म् । ब्र॒ह्म॒ह॒त्याया॑ इति॑ ब्र॒ह्म–ह॒त्यायै॑ । हि । ए॒षः । वर्णः॑ ।
 अथो॑ इति॑ । ख॒लु । यः । ए॒व । लो॒हितः॑ । यः । वा ।
 आ॒व्रश्च॑ना॒दित्या॑ – व्रश्च॑नात् । नि॒र्ये॒षतीति॑ निः – ये॒षति॑ । तस्य॑ । न ।
 आ॒श्रय॑म् । ४ (50)

2.5.1.5

का॒मम॒न्यस्य॑स॒स्त्रीष॑सा॒द–मु॒पा॒सीद॑दस्यै॑ ब्र॒ह्म॒ह॒त्यायै॑ तृ॒तीयं
 प्र॒ति गृ॒ह्णीते॑ति॒ ता अ॑ब्रुवन् वरं॑ वृ॒णाम॑हा ऋ॒त्वियात् प्र॒जां वि॑न्दाम॒है
 का॒ममा॑ वि॒जनि॑तोः सं भ॒वामेति॑ तस्मा॑दृ॒त्वियाथ् स्त्रियः॑ प्र॒जां
 वि॑न्दन्ते॒ का॒ममा॑ वि॒जनि॑तोः संभव॑न्ति वारै॑वृ॒त ह्या॑सां तृ॒तीयं
 ब्र॒ह्म॒ह॒त्यायै॑ प्रत्य॑गृ॒ह्णन्थ् सा॑ म॒लव॑द्वासा॒ अभ॑वत् तस्मा॑न्–म॒लवद्–
 वा॒ससा॑ न सँ॑वेदेत् – [] 5

2.5.1.5 - Padam

कामम् । अन्यस्य । सः । स्त्रीष॑सादमिति स्त्री – स॑सादम् ।
उपेति । आसीदत् । अस्यै । ब्रह्म॑हत्याया इति ब्रह्म – हत्यायै॑ ।
तृतीयम् । प्रतीति । गृहीत । इति । ताः । अब्रुवन् । वरम् ।
वृणाम॑है । ऋत्वियात् । प्रजामिति प्र – जाम् । विन्दाम॑है ।
कामम् । एति । विज॑नितोरिति वि – ज॒नितोः । समिति । भवाम् ।
इति । तस्मात् । ऋत्वियात् । स्त्रियः । प्रजामिति प्र-जाम् । विन्दते ।
कामम् । एति । विज॑नितोरिति वि – ज॒नितोः । समिति । भवन्ति ।
वारे॑वृतमिति वारे – वृतम् । हि । आसाम् । तृतीयम् । ब्रह्म॑हत्याया
इति ब्रह्म – हत्यायै॑ । प्रतीति । अगृह्णन् । सा । मल॑वद्वासा इति
मल॑वत् – वासाः । अभवत् । तस्मात् । मल॑वद्वाससेति
मल॑वत् – वास॒सा । न । समिति । वदेत । 5 (50)

2.5.1.6

न सहाऽऽसीत् नास्या अन्न॑मद्याद्-ब्रह्म॑हत्यायै ह्येषा वर्णं प्रतिमुच्या
ऽऽस्तेऽथो खल्वा॑हुरभ्यञ्जनं वाव स्त्रिया अन्न॑मभ्यञ्जनमेव न

प्रति॑गृह्यं॒ काम॑मन्यदिति॒ यां॒ मल॑वद्-वासस॑ꣳ सं॒भव॑न्ति॒ यस्त॑तो॒
जाय॑ते॒ सोऽभि॑शस्तो॒ याम॑रण्ये॒ तस्यै॑ स्तेनो॒ यां॒ परा॑चीं॒ तस्यै॑
हीत॑मुख्यपगल्भो॒ या स्ना॑ति॒ तस्या॑ अ॒प्सु मा॑रुको॒ या - [] 6

2.5.1.6 - Padam

न । सह । आसी॑त । न । अ॒स्याः । अन्न॑म् । अ॒द्यात् । ब्र॒ह्म॒ह॒त्याया॑
इति॑ ब्र॒ह्म - ह॒त्यायै॑ । हि । ए॒षा । वर्ण॑म् । प्र॒तिमु॑च्येति॒ प्रति॑-मुच्य ।
आस्ते॑ । अथो॒ इति॑ । खलु॑ । आ॒हुः ।
अ॒भ्यज्ज॑नमित्यभि - अज्ज॑नम् । वाव । स्त्रि॒याः । अन्न॑म् ।
अ॒भ्यज्ज॑नमित्यभि - अज्ज॑नम् । ए॒व । न । प्र॒तिगृ॑ह्यमिति॒
प्रति॑ - गृ॒ह्यम् । काम॑म् । अ॒न्यत् । इति॑ । याम् । मल॑वद्वाससमिति॒
मल॑वत् - वा॒स॒सम् । सं॒भव॑न्तीति॒ सं - भव॑न्ति । यः । ततः ।
जाय॑ते । सः । अ॒भि॒शस्त॑ इत्यभि-शस्तः । याम् । अ॒रण्ये॑ । तस्यै॑ ।
स्तेनः॑ । याम् । परा॑चीम् । तस्यै॑ । ही॒तमु॑खीति॒ हीत॑ - मु॒खी ।

अ॒प॒ग॒ल्भ॒ इत्य॑प – ग॒ल्भः॑ । या । स्ना॑ति । तस्याः॑ ।

अ॒प्सि॒त्यप् – सु॑ । मा॒रु॒कः॑ । या । 6 (50)

2.5.1.7

अ॒भ्य॒ङ्गे॑ तस्यै॑ दु॒श्च॒र्मा॑ या प्र॒लि॒ख॒ते॑ तस्यै॑ ख॒ल॒ति॒र॒प॒मा॒री॑ याऽङ्गे॑ तस्यै॑
का॒णो॑ या द॒तो॑ धा॒व॒ते॑ तस्यै॑ श्या॒व॒द॒न् या॑ न॒खा॒नि॑ नि॒कृ॒न्त॒ते॑ तस्यै॑
कु॒न॒खी॑ या कृ॒ण॒ति॑ तस्यै॑ क्ली॒बो॑ या रज्जु॑ सृ॒ज॒ति॑ तस्या॑ उ॒द्-
ब॒न्धु॒को॑ या प॒र्णे॒न॑ पि॒ब॒ति॑ तस्या॑ उ॒न्मा॒दु॒को॑ या ख॒र्वे॒ण॑ पि॒ब॒ति॑ तस्यै॑
ख॒र्व॒स्ति॒स्रो॑ रा॒त्री॒र्व॒तं॑ च॒रे॒द॒ज्ज॒लि॒ना॑ वा पि॒बे॒द॒ख॒र्वे॒ण॑ वा () पा॒त्रे॒ण॑
प्र॒जा॒यै॑ गो॒पी॒था॒य॑ । 7

2.5.1.7 - Padam

अ॒भ्य॒ङ्ग॒ इत्य॑भि – अ॒ङ्गे॑ । तस्यै॑ । दु॒श्च॒र्मे॒ति॑ दुः – च॒र्मा॑ । या ।

प्र॒लि॒ख॒त॒ इति॑ प्र – लि॒ख॒ते॑ । तस्यै॑ । ख॒ल॒तिः॑ ।

अ॒प॒मा॒री॒त्यप॑ – मा॒री॑ । या । आ॒ङ्ग॒ इत्या॑ – अ॒ङ्गे॑ । तस्यै॑ । का॒णः॑ ।

या । द॒तः॑ । धा॒व॒ते॑ । तस्यै॑ । श्या॒व॒द॒न्ति॑ श्या॒व – द॒न् । या ।

न॒खा॒नि॑ । नि॒कृ॒न्त॒त॒ इति॑ नि – कृ॒न्त॒ते॑ । तस्यै॑ । कु॒न॒खी॑ । या ।

कृ॒ण॒ति॒ । त॒स्यै॑ ॥ क॒ली॒बः॑ । या । र॒ज्जु॒म् । सृ॒ज॒ति॒ । त॒स्याः॑ ॥
 उ॒द्व॒न्धु॒क॒ इत्यु॑त् – ब॒न्धु॒कः॑ । या । प॒र्णे॒न॑ । पि॒ब॒ति॒ । त॒स्याः॑ ॥
 उ॒न्मा॒दु॒क॒ इत्यु॑त् – मा॒दु॒कः॑ । या । ख॒र्वे॒ण॑ । पि॒ब॒ति॒ । त॒स्यै॑ ॥ ख॒र्वः॑ ।
 ति॒स्रः॑ । रा॒त्रीः॑ । व्र॒त॒म् । च॒रे॒त् । अ॒ज्ज॒लि॒ना॑ । वा । पि॒बे॒त् ।
 अ॒ख॒र्वे॒ण॑ । वा () । पा॒त्रे॒ण॑ । प्र॒जा॒या॒ इति॑ प्र – जा॒यै॑ ॥

गो॒पी॒था॒य॑ । 7 (53)

(यथ् सो॒म॒पा॒नं॑ – ते – वृ॒क्ष॒णा॒त् – तस्य॑ नाऽऽ॒इ॒यं॑ – वै॒दे॒त –
 मा॒रु॒को॒ या – ख॒र्वे॒ण॑ वा – त्री॒णि॑ च) (A1)

2.5.2.1

त्व॒ष्टा॑ ह॒त॒पु॒त्रो॒ वी॒न्द्र॒ः सो॒म॒मा॒ह॒र॒त् तस्मि॑न्निन्द्र॒ उप॒ह॒व॒मै॒च्छ॒त॒
 तं नो॑पा॒ह्व॒य॒त पु॒त्रं मे॑ऽव॒धी॒रि॒ति॒ स य॑ज्ञ॒वे॒श॒सं॑ कृ॒त्वा प्रा॒स॒हा॒
 सो॒म॒म॒पि॒ब॒त् तस्य॑ यद॒त्य॒शि॒ष्य॒त तत् त्व॒ष्टाऽऽ॒ह॒व॒नी॒य॒मु॒प॒
 प्रा॒व॒र्त॒य॒थ् स्वा॑हेन्द्र॒श॒त्रु॒र्व॒र्ध॒स्वे॒ति॒ यद॑व॒र्त॒य॒त् तद्-वृ॒त्र॒स्य॑ वृ॒त्र॒त्वं॑
 यद॑ब्रवी॒थ् स्वा॑हेन्द्र॒श॒त्रु॒र्व॒र्ध॒स्वे॒ति॒ तस्मा॑द॒स्ये॒- [] 8

2.5.2.1 - Padam

त्व॑ष्टा । ह॒तपु॒त्र इति॑ ह॒त-पु॒त्रः । वी॒न्द्रमि॒ति वि - इ॒न्द्रम् । सोम॑म् ।
एति॑ । अ॒हरत् । तस्मि॑न् । इ॒न्द्रः । उप॒हव॑मित्युप-ह॒वम् । ऐ॒च्छ॒त ।
तम् । न । उपे॑ति । अ॒ह्वय॑त । पु॒त्रम् । मे । अ॒वधीः॑ । इति॑ । सः ।
य॒ज्ञवै॒शस॑मिति॑ य॒ज्ञ - वै॒शस॑म् । कृ॒त्वा । प्रा॒सहे॑ति॑ प्र - स॒हा ।
सोम॑म् । अ॒पिब॑त् । तस्य॑ । यत् । अ॒त्यशि॑ष्यतेत्यति॑ - अ॒शिष्य॑त ।
तत् । त्व॑ष्टा । आ॒हव॑नीयमित्या॑-ह॒वनीय॑म् । उप॑ । प्रेति॑ । अ॒वर्त॑यत् ।
स्वा॒हा । इ॒न्द्रश॑त्रुरि॒तीन्द्र॑ - श॒त्रुः । वर्ध॑स्व । इति॑ । यत् ।
अ॒वर्त॑यत् । तत् । वृ॒त्रस्य॑ । वृ॒त्रत्व॑मिति॑ वृ॒त्र-त्व॑म् । यत् । अ॒ब्रवी॑त् ।
स्वा॒हा । इ॒न्द्रश॑त्रुरि॒तीन्द्र॑ - श॒त्रुः । वर्ध॑स्व । इति॑ । तस्मा॑त् ।

अ॒स्य । ८ (५०)

2.5.2.2

-न्द्रः॑ श॒त्रुर॑भव॒त् स सं॑भव॒न्नग्नी॑षोमा॒वभि॑ सम॒भव॒त् स
इ॒षुमा॑त्रमि॒षुमा॑त्रं वि॒ष्वङ्गु॑वर्ध॒त स इ॒मां लो॒कान॑वृ॒णोद्य॑दि॒मां

लोकान॑वृ॒णो॒त् तद्-वृ॒त्रस्य॑ वृ॒त्रत्वं॑ तस्मा॑दिन्द्रोऽ॒बिभे॑त् स
प्र॒जाप॑तिमुपा॒धाव॑-च्छ॒त्रुर्मे॑ऽ जनी॒ति तस्मै॑ वज्रं॑ सि॒क्त्वा
प्राय॑च्छदे॒तेन॑ ज॒हीति॑ तेना॒भ्याय॑त ताव॒ब्रूता॑मग्नी॒षोमौ॑ मा - [] 9

2.5.2.2 - Padam

इन्द्रः॑ । श॒त्रुः । अ॒भव॑त् । सः । सं॒भव॑न्निति॑ सं - भव॑न् ।
अ॒ग्नी॒षोमा॑वित्य॒ग्नी - सोमौ॑ । अ॒भि । समि॑ति । अ॒भव॑त् । सः ।
इ॒षुमा॑त्रमि॒षुमा॑त्रमि॒तीषु॑मा॒त्रं - इ॒षुमा॑त्रम् । वि॒ष्वङ् । अ॒वर्ध॑त । सः ।
इ॒मान् । लो॒कान् । अ॒वृ॒णो॒त् । यत् । इ॒मान् । लो॒कान् । अ॒वृ॒णो॒त् ।
तत् । वृ॒त्रस्य॑ । वृ॒त्रत्व॑मिति॑ वृ॒त्र-त्व॑म् । तस्मा॑त् । इन्द्रः॑ । अ॒बिभे॑त् ।
सः । प्र॒जाप॑तिमिति॑ प्र॒जा-प॑तिम् । उपे॑ति । अ॒धाव॑त् । श॒त्रुः । मे॒ ।
अ॒जनि॑ । इति॑ । तस्मै॑ । वज्र॑म् । सि॒क्त्वा । प्रेति॑ । अ॒यच्छ॑त् ।
ए॒तेन॑ । ज॒हि । इति॑ । तेन॑ । अ॒भीति॑ । आ॒यत॑ । तौ । अ॒ब्रूता॑म् ।
अ॒ग्नी॒षोमा॑वित्य॒ग्नी - सोमौ॑ । मा । 9 (50)

2.5.2.3

प्र॒हारा॑वमन्तः स्व॒ इति॑ म॒म वै यु॒व॒स्थ इत्य॑ब्रवीन्माम॒भ्येत॑मिति
तौ भा॒ग॒धेय॑मैच्छेतां ताभ्या॒-मे॒त॒म॒ग्नी॒षोमी॑य-मे॒काद॑शकपालं
पूर्णा॑मा॒से प्रा॒यच्छ॑त् ताव॒ब्रूता॑म॒भि सं॒द॒ष्टौ वै स्वो॑ न श॒क्नु॒व ऐ॒तुमि॑ति
स इन्द्र॑ आ॒त्मनः॑ शी॒तरू॒राव॑जनयत् तच्छी॒तरू॒रयो॑र्जन्म॒ य ऐ॒व॒
शी॒तरू॒रयो॑र्जन्म वे॒द - [] 10

2.5.2.3 - Padam

प्रे॒ति । हाः । आ॒वम् । अ॒न्तः । स्वः । इति॑ । म॒म । वै । यु॒वम् ।
स्थः । इति॑ । अ॒ब्रू॒वीत् । मा॒म् । अ॒भि । ए॒ति । इ॒तम् । इति॑ । तौ ।
भा॒ग॒धेय॑मि॒ति भा॒ग - धे॒यम् । ऐ॒च्छे॒ताम् । ता॒भ्याम् । ए॒तम् ।
अ॒ग्नी॒षोमी॑यमि॒त्यग्नी॑ - सो॒मीय॑म् ।
ए॒काद॑शकपालमि॒त्येका॑दश - क॒पालम् ।
पूर्णा॑मा॒स इति॑ पूर्ण - मा॒से । प्रे॒ति । अ॒यच्छ॑त् । तौ । अ॒ब्रू॒ताम् ।
अ॒भीति॑ । सं॒द॒ष्टा॒विति॑ सं - द॒ष्टौ । वै । स्वः । न । श॒क्नु॒वः ।
ऐ॒तुमि॑त्या - ए॒तुम् । इति॑ । सः । इन्द्रः॑ । आ॒त्मनः॑ ।

शी॒तरू॒रावि॒ति शी॒त – रू॒रौ । अ॒ज॒न॒य॒त् । तत् । शी॒तरू॒रयो॒रिति॑
शी॒त – रू॒रयोः॑ । ज॒न्म । यः । ए॒वं ।

शी॒तरू॒रयो॒रिति॑ शी॒त – रू॒रयोः॑ । ज॒न्म । वे॒द । 10 (50)

2.5.2.4

नै॒न॒ञ् शी॒तरू॒रौ ह॒त॒स्ता॒भ्यामे॒नम॒भ्यन॒य॒त् तस्मा॑ – ज्ज॒ञ्च॒भ्यमा॑नाद॒ग्नी॒षोमौ॑
नि॒रक्रा॑म॒तां प्रा॒णापा॑नौ वा ए॒नं तद॑ज॒हितां॑ प्रा॒णो वै दक्षो॑ऽपानः
क्र॒तुस्तस्मा॑ – ज्ज॒ञ्च॒भ्यमा॑नो ब्रू॒यान्म॒यि दक्ष॑क्र॒तू इति॑
प्रा॒णापा॑नावे॒वाऽऽत्म॑न् ध॒त्ते स॒र्वमा॑यु॒रेति॑ स दे॒वता॑ वृ॒त्रान्नि॒र्हू॒य
वा॒त्रघ्न॑ञ् ह॒विः पू॒र्णमा॑से नि॒रव॑प॒द् घ्न॑न्ति वा ए॒नं

पू॒र्णमा॑स आ – [] 11

2.5.2.4 - Padam

न । ए॒नम् । शी॒तरू॒रावि॒ति शी॒त – रू॒रौ । ह॒तः । ता॒भ्याम् ।
ए॒नम् । अ॒भीति॑ । अ॒न॒य॒त् । तस्मा॑त् । ज्ज॒ञ्च॒भ्यमा॑नात् ।
अ॒ग्नी॒षोमा॑वित्य॒ग्नी – सो॒मौ । नि॒रिति॑ । अ॒क्रा॒म॒ताम् ।
प्रा॒णापा॑नावि॒ति प्रा॒ण – अ॒पानौ॑ । वै । ए॒नम् । तत् । अ॒ज॒हिता॑म् ।

प्रा॒ण इति॑ प्र – अनः॑ । वै । दक्षः॑ । अपा॒न इत्य॑प – अनः॑ । क्रतुः॑ ।
तस्मा॑त् । ज॒ञ्ज॒भ्यमा॑नः । ब्रू॒यात् । मयि॑ । दक्ष॒क्रतू॑ इति॑ दक्ष-क्रतू ।
इति॑ । प्रा॒णापा॒नावि॑ति प्रा॒ण – अपा॒नौ । ए॒व । आ॒त्मन् । धत्ते॑ ।
सर्व॑म् । आ॒युः । ए॒ति । सः । दे॒वताः॑ । वृ॒त्रात् । निर्हू॑येति॑
निः – हू॒य । वा॒र्त्रघ्न॑मिति॑ वा॒र्त्र – घ्न॒म् । ह॒विः । पू॒र्णमा॑स इति॑
पू॒र्ण – मा॒से । नि॒रिति॑ । अ॒वप॑त् । घ्नन्ति॑ । वै । ए॒नम् ।
पू॒र्णमा॑स इति॑ पू॒र्ण – मा॒से । ए॒ति । 11 (50)

2.5.2.5

ऽमा॒वास्या॑यां प्या॒यय॑न्ति तस्मा॑द्-वा॒र्त्रघ्नी॑ पू॒र्णमा॑से ऽनू॒च्येते॑
वृ॒धन्व॑ती अ॒मावा॑स्यायां तथ् स॒ऽस्थाप्य॑ वा॒र्त्रघ्न॑ ह॒विर्वज्र॑मा॒दाय॑
पुन॑र॒भ्याय॑त ते अ॒ब्रूतां॑ द्या॒वापृ॑थि॒वी मा प्र॑ हा॒रावयो॑र्वे श्रि॒त इति॑ ते
अ॒ब्रूतां॑ वरं॑ वृ॒णाव॑है नक्ष॒त्रवि॑हिता-ऽह॒मसा॑नीत्य॒साव॑ब्रवी-
च्चि॒त्रवि॑हिता- ऽह॒मिती॑यं तस्मा॑न्नक्ष॒त्रवि॑हिताऽसौ चि॒त्रवि॑हितेऽयं यं
ए॒वं द्या॒वापृ॑थि॒व्यो – [] 12

2.5.2.5 - Padam

अ॒मा॒वा॒स्या॒या॒मि॒त्य॒मा – वा॒स्या॒या॒म् । प्या॒य॒य॒न्ति॑ । तस्मा॑त् ।
वा॒र्त्र॒घ्नी॑ इति॑ वा॒र्त्र – घ्नी॑ । पू॒र्ण॒मा॒स इति॑ पू॒र्ण – मा॒से । अ॒न्वि॒ति॑ ।
उ॒च्ये॒ते इति॑ । वृ॒ध॒न्व॒ती इति॑ वृ॒ध॒न् – व॒ती ।
अ॒मा॒वा॒स्या॒या॒मि॒त्य॒मा – वा॒स्या॒या॒म् । तत् । स॒॒स्था॒प्ये॒ति॑
सं – स्था॒प्य । वा॒र्त्र॒घ्न॒मि॒ति॑ वा॒र्त्र – घ्न॒म् । ह॒विः॑ । व॒ज्र॒म् ।
आ॒दा॒ये॒त्या – दा॒य । पुनः॑ । अ॒भी॒ति॑ । आ॒य॒त । ते॑ इति॑ । अ॒ब्रू॒ता॒म् ।
द्या॒वा॒पृ॒थि॒वी इति॑ द्या॒वा – पृ॒थि॒वी । मा । प्रे॒ति॑ । हाः॑ । आ॒व॒योः॑ ।
वै । श्रि॒तः॑ । इति॑ । ते॑ इति॑ । अ॒ब्रू॒ता॒म् । व॒र॒म् । वृ॒णा॒व॒है ।
नक्ष॑त्रविहि॒तेति॑ नक्ष॑त्र – विहि॒ता । अ॒ह॒म् । अ॒सा॒नि । इति॑ ।
अ॒सौ । अ॒ब्रू॒वीत् । चि॒त्र॒विहि॒तेति॑ चि॒त्र – विहि॒ता । अ॒ह॒म् । इति॑ ।
इ॒य॒म् । तस्मा॑त् । नक्ष॑त्रविहि॒तेति॑ नक्ष॑त्र – विहि॒ता । अ॒सौ ।
चि॒त्र॒विहि॒तेति॑ चि॒त्र – विहि॒ता । इ॒य॒म् । यः॑ । ए॒व॒म् ।
द्या॒वा॒पृ॒थि॒व्यो॒रिति॑ द्या॒वा – पृ॒थि॒व्योः॑ । 12 (50)

2.5.2.6

–वरं॑ वे॒दै॒नं॑ वे॒रो॑ ग॒च्छ॒ति॑ स॒ आ॒भ्या॒मे॒व॑ प्र॒सू॒त॑ इ॒न्द्रो॑ वृ॒त्र॒म॒ह॒न् ते॑
दे॒वा वृ॒त्रं॑ ह॒त्वा अ॒ग्नी॒षो॒मा॒व॒ब्रु॒वन्॑ ह॒व्यं॑ नो॒ वह॒त॒मि॒ति॑
ता॒व॒ब्रू॒ता॒म॒प॒ते॒ज॒सौ॒ वै त्यौ॑ वृ॒त्रे॒ वै त्यो॑स्ते॒ज इति॑ ते॒ऽब्रु॒वन्॑ क
इ॒द॒म॒च्छै॒तीति॑ गौ॒रि॒त्य॒ब्रु॒वन्॑ गौ॒र्वा॒व॒ सर्व॑स्य॒ मि॒त्र॒मि॒ति॑
सा॒ऽब्र॒वी – [] 13

2.5.2.6 - Padam

वर॑म् । वे॒द॒ । ए॒ति॒ । ए॒न॒म् । वरः॑ । ग॒च्छ॒ति॒ । सः॑ । आ॒भ्या॒म् । ए॒व॒ ।
प्र॒सू॒त॑ इति॒ प्र – सू॒तः॑ । इ॒न्द्रः॑ । वृ॒त्र॒म् । अ॒ह॒न् । ते॑ । दे॒वाः॑ ।
वृ॒त्र॒म् । ह॒त्वा । अ॒ग्नी॒षो॒मा॒वि॒त्य॒ग्नी – सो॒मौ॑ । अ॒ब्रु॒वन् । ह॒व्य॒म् ।
नः॑ । वह॒त॒म् । इति॑ । तौ॑ । अ॒ब्रू॒ता॒म् । अ॒प॒ते॒ज॒सा॒वि॒त्य॒प॒ते॒ज॒सौ॑ ।
वै । त्यौ॑ । वृ॒त्रे॒ । वै । त्यो॑ः । ते॒जः॑ । इति॑ । ते॑ । अ॒ब्रु॒वन् । कः॑ ।
इ॒द॒म् । अ॒च्छ॒ । ए॒ति॒ । इति॑ । गौः॑ । इति॑ । अ॒ब्रु॒वन् । गौः॑ । वा॒व॒ ।
सर्व॑स्य॒ । मि॒त्र॒म् । इति॑ । सा॑ । अ॒ब्र॒वीत् । 13 (50)

2.5.2.7

–द्व॑रं वृ॒णै॑ म॒य्ये॒व स॒तोऽ॒भ्ये॑न भु॒न॒जा॒ध्वा इति॑ तद्–गौ॒राऽ॒हर॑त्
तस्मा॑द्–गवि॑ स॒तो॒भ्ये॑न भु॒ञ्ज॑त ए॒तद्वा अ॒ग्ने॒स्ते॒जो यद् घृ॒तमे॑तत्
सो॒मस्य॑ यत् पयो॑ य ए॒वम॒ग्नी॒षोम॑यो स्ते॒जो वे॒द ते॒जस्व्ये॑व भ॒वति॑
ब्र॒ह्मवा॑दिनो॒ वद॑न्ति किं॒दे॒वत्यं॑ पौ॒र्ण॒मा॒समि॑ति प्रा॒जाप॑त्यमि॒ति ब्रू॑यात्
ते॒नेन्द्रं॑ ज्येष्ठं पु॒त्रं नि॒रवा॑सायय॒दिति॑ तस्मा॑– () –ज्येष्ठं पु॒त्रं ध॒नेन॑
नि॒रवा॑साययन्ति । 14

2.5.2.7 - Padam

वर॑म् । वृ॒णै॑ । म॒यि॑ । ए॒व । स॒ता । उ॒भ्ये॑न । भु॒न॒जा॒ध्वै॑ । इति॑ ।
तत् । गौः॑ । ए॒ति॑ । अ॒हर॑त् । तस्मा॑त् । गवि॑ । स॒ता । उ॒भ्ये॑न ।
भु॒ञ्ज॑ते । ए॒तत् । वै । अ॒ग्नेः॑ । ते॒जः॑ । यत् । घृ॒तम् । ए॒तत् ।
सो॒मस्य॑ । यत् । पयः॑ । यः । ए॒वं । अ॒ग्नी॒षोम॑योरि॒त्यग्नी॑–सो॒मयोः॑ ।
ते॒जः॑ । वे॒द । ते॒जस्वी॑ । ए॒व । भ॒वति॑ । ब्र॒ह्मवा॑दिन इति॑
ब्र॒ह्म – वा॑दिनः । वद॑न्ति । किं॒दे॒वत्यमि॑ति किं – दे॒वत्यम्॑ ।

पौ॒र्ण॒मा॒समि॒ति पौ॒र्ण – मा॒सम् । इति॑ । प्रा॒जाप॒त्यमि॒ति
 प्र॒जा – प॒त्यम् । इति॑ । ब्रू॒यात् । तेन॑ । इन्द्र॑म् । ज्येष्ठ॑म् । पु॒त्रम् ।
 नि॒रवा॑साययदिति॑ निः–अवा॑साययत् । इति॑ । तस्मा॑त् () । ज्येष्ठ॑म् ।
 पु॒त्रम् । ध॒नेन॑ । नि॒रव॑साययन्तीति॑ निः – अ॒वसा॑ययन्ति । 14 (54)

(अ॒स्य – मा – वे॒दा – ऽऽ – द्यावा॑पृ॒थिव्यो – र॒ब्रवी –
 दि॒ति तस्मा॑ – च॒त्वारि॑ च) (A2)

2.5.3.1

इन्द्रं॑ वृ॒त्रं ज॒घ्निवा॑सं मृ॒धोऽभि॑ प्रावे॒पन्त॑ स ए॒तं वैमृ॑धं
 पू॒र्णमा॑सेऽनुनिर्वाप्यमपश्यत् तं नि॒रव॑पत् तेन॑ वै स मृ॒धोऽपा॑हत
 यद्वैमृ॑धः पू॒र्णमा॑सेऽनुनिर्वाप्यो भवति॑ मृ॒ध ए॒व तेन॑ यज॒मानोऽप॑ हत
 इन्द्रो॑ वृ॒त्रं ह॒त्वा दे॒वता॑भिश्चेन्द्रि॒येण॑ च व्या॒र्ध्यत॑ स ए॒तमा॑ग्नेय–
 म॒ष्टाक॑पाल–ममावास्यायामपश्यदैन्द्रं॑ दधि – [] 15

2.5.3.1- Padam

इन्द्र॑म् । वृ॒त्रम् । ज॒घ्निवा॑सम् । मृ॒धः । अ॒भि । प्रेति॑ । अ॒वे॒पन्त॑ ।
 सः । ए॒तम् । वैमृ॑धम् । पू॒र्णमा॑स इति॑ पू॒र्ण – मा॒से ।

अ॒नु॒नि॒र्वा॒प्य॒मि॒त्य॒नु॒ – नि॒र्वा॒प्य॒म् । अ॒प॒श्य॒त् । तम् । नि॒रि॒ति॒ ।
 अ॒व॒प॒त् । ते॒न॒ । वै । सः । मृ॒धः । अ॒पे॒ति॒ । अ॒ह॒त॒ । य॒त् । वै॒मृ॒धः ।
 पू॒र्ण॒मा॒स॒ इति॑ पू॒र्ण॒ – मा॒से॒ । अ॒नु॒नि॒र्वा॒प्य॒ इत्य॑नु॒ – नि॒र्वा॒प्यः॒ ।
 भ॒व॒ति॒ । मृ॒धः । ए॒व॒ । ते॒न॒ । य॒ज॒मा॒नः॒ । अ॒पे॒ति॒ । ह॒ते॒ । इ॒न्द्रः॒ ।
 वृ॒त्रम् । ह॒त्वा । दे॒वता॑भिः । च॒ । इ॒न्द्रि॒येण॑ । च॒ । वी॒ति॒ । आ॒र्ध्य॒त॒ ।
 सः । ए॒तम् । आ॒ग्ने॒यम् । अ॒ष्टा॒क॒पा॒ल॒मि॒त्य॒ष्टा॒ – क॒पा॒लम् ।
 अ॒मा॒वा॒स्या॒या॒मि॒त्य॒मा॒ – वा॒स्या॒याम् । अ॒प॒श्य॒त् ।

ऐ॒न्द्रम् । दधि॑ । 15 (50)

2.5.3.2

तं॑ नि॒र॒व॒प॒त् ते॒न॒ वै स॒ दे॒वता॑श्चे॒न्द्रि॒यं चा॒वा॒रु॒न्ध॒य॒दा॒ग्ने॒यो ऽष्टा॑क॒पालो॑
 ऽमा॒वा॒स्या॒यां भ॒व॒त्यै॒न्द्रं दधि॑ दे॒वता॑श्चै॒व ते॒नै॒न्द्रि॒यं च॒ य॒ज॒मा॒नोऽव॑
 रु॒न्ध इ॒न्द्र॒स्य वृ॒त्रं ज॒घ्नु॒ष इ॒न्द्रि॒यं वी॒र्यं॑ पृ॒थि॒वीम॒नु व्या॑र्च्छत्
 तदो॑ष॒धयो॑ वी॒रु॒धोऽभ॒व॒न्त्स प्र॒जा॒प॒ति॒मु॒पा॒धा॒वद्-वृ॒त्रं मे॑ ज॒घ्नु॒ष
 इ॒न्द्रि॒यं वी॒र्यं॑ – [] 16

2.5.3.2 - Padam

तम् । निरि॑ति । अ॒वप॑त् । ते॒न । वै । सः । दे॒वताः॑ । च । इ॒न्द्रि॒यम् ।
च । अवे॑ति । अ॒रुन्ध॑ । यत् । आ॒ग्ने॒यः । अ॒ष्टाक॑पाल
इत्य॑ष्टा – क॒पालः । अ॒मावा॑स्याया॒मित्य॑मा – वा॒स्याया॑म् । भव॑ति ।
ऐ॒न्द्रम् । दधि॑ । दे॒वताः॑ । च । ए॒व । ते॒न । इ॒न्द्रि॒यम् । च ।
यज॑मानः । अवे॑ति । रु॒न्धे । इ॒न्द्रस्य॑ । वृ॒त्रम् । ज॒घ्नुषः॑ । इ॒न्द्रि॒यम् ।
वी॒र्यम्॑ । पृ॒थि॒वीम् । अ॒नु । वी॒ति । आ॒च्छत् । तत् । ओ॒षध॑यः ।
वी॒रुधः॑ । अ॒भव॑न् । सः । प्र॒जाप॑तिमि॒ति प्र॒जा – प॒तिम् । उ॒पेति॑ ।
अ॒धाव॑त् । वृ॒त्रं । मे । ज॒घ्नुषः॑ । इ॒न्द्रि॒यम् । वी॒र्यम्॑ । 16 (50)

2.5.3.3

पृ॒थि॒वीम॑नु॒ व्या॒रत् । तदो॑षधयो॒ वी॒रुधो॑ऽभू॒वन्निति॑ स प्र॒जाप॑तिः
प॒शून्ब्र॑वीदे॒तदस्मै॑ सं ने॒यते॑ति॒ तत् प॒शव॑ ओ॒षधी॑भ्यो ऽध्या॒त्मन्थ्
स॒मन॑यन् तत् प्र॒त्यदु॑हन् यथ् स॒मन॑यन् तत् सां ना॒य्यस्य॑ सां ना॒य्यत्वं
यत् प्र॒त्यदु॑हन् तत् प्र॒तिधु॑षः प्र॒तिधु॑क्त्वꣳ स॒मनै॑षुः प्र॒त्यधु॑क्षन्
न तु म॑यि श्रय॑त इत्य॑ब्रवीदे॒तदस्मै॑ – [] 17

2.5.3.3 - Padam

पृ॒थि॒वीम् । अनु॑ । वी॒ति॑ । आ॒रत् । तत् । औष॑धयः । वी॒रुधः॑ ।
अ॒भू॒वन् । इति॑ । सः । प्र॒जाप॑तिरिति॑ प्र॒जा – प॒तिः । प॒शून् ।
अ॒ब्रवी॑त् । ए॒तत् । अ॒स्मै । स॒मिति॑ । न॒यत॑ । इति॑ । तत् । प॒शवः॑ ।
औष॑धीभ्य इत्योष॑धि – भ्यः । अधी॑ति । आ॒त्मन् । स॒मिति॑ ।
अ॒नय॑न् । तत् । प्र॒तीति॑ । अ॒दुह॑न् । यत् । स॒मन॑यन्निति॑
सं – अ॒नय॑न् । तत् । सा॒नाय्य॑स्येति॑ सां – ना॒य्यस्य॑ ।
सा॒नाय्य॑त्वमिति॑ सा॒नाय्य॑ – त्वम् । यत् । प्र॒त्यदु॑हन्निति॑
प्रति॑ – अ॒दुह॑न् । तत् । प्र॒तिधु॑ष इति॑ प्रति॑ – धुषः॑ ।
प्र॒तिधु॑क्त्वमिति॑ प्रति॒धुक् – त्वम् । स॒मिति॑ । अ॒नैषुः॑ । प्र॒तीति॑ ।
अ॒धुक्ष॑न् । न । तु । मयि॑ । श्रय॑ते । इति॑ । अ॒ब्रवी॑त् । ए॒तत् ।
अ॒स्मै । 17 (50)

2.5.3.4

शृ॒तं कु॑रुतेत्यब्रवी॑त् तद॒स्मै शृ॒त-म॑कुर्वन्निन्द्रि॒यं वा॑वास्मिन् वी॒र्यं
तद॒श्रय॑न् तच्छृ॒तस्य॑ शृ॒तत्व॑न् सम॒नैषुः॑ प्र॒त्यधु॑क्षञ्छृ॒तम॑क्रन् न तु मा

धि॒नो॒ती॒त्य॒ब्र॒वी॒दे॒त॒द॒स्मै॒ दधि॑ कुरु॒ते॒त्य॒ब्र॒वी॒त् तद॒स्मै॒ दध्य॑कुर्वन्

तदे॒न॒मधि॑नोत् तद्द॒ध्नो॑ दधित्वं ब्रह्म॒वा॒दि॒नो॑ वदन्ति द॒ध्नः॑

पूर्व॑स्यावदेयं – [] 18

2.5.3.4 - Padam

शृ॒तम् । कु॒रु॒त । इति॑ । अ॒ब्र॒वी॒त् । तत् । अ॒स्मै॒ । शृ॒तम् ।

अ॒कुर्व॑न् । इन्द्रि॒यम् । वाव॑ । अ॒स्मिन् । वी॒र्य॑म् । तत् । अ॒श्रय॑न् ।

तत् । शृ॒तस्य॑ । शृ॒तत्व॑मिति शृ॒त – त्वम् । स॒मि॒ति॑ । अ॒नैषुः॑ ।

प्रती॑ति । अ॒धुक्ष॑न् । शृ॒तम् । अ॒क्रन् । न । तु । मा । धि॒नो॒ति॒ ।

इति॑ । अ॒ब्र॒वी॒त् । ए॒तत् । अ॒स्मै॒ । दधि॑ । कु॒रु॒त । इति॑ । अ॒ब्र॒वी॒त् ।

तत् । अ॒स्मै॒ । दधि॑ । अ॒कुर्व॑न् । तत् । ए॒नम् । अ॒धि॒नो॒त् । तत् ।

द॒ध्नः॑ । दधित्व॑मिति दधि – त्वम् । ब्रह्म॒वा॒दि॒न इति॑ ब्रह्म॒वा॒दि॒नः॑ ।

वद॑न्ति । द॒ध्नः॑ । पूर्॒वस्य॑ । अ॒वदे॑यमित्यव – दे॒यम्॑ । 18 (50)

2.5.3.5

दधि॑ हि पूर्॒वं क्रि॒यत॑ इत्य॒नादृ॑त्य तच्छृ॒तस्यै॒व पूर्॒वस्या॑व

द्येदिन्द्रि॒यमे॒वास्मिन्॑ वी॒र्यं॑ श्रित्वा द॒ध्नो॑ परि॒ष्टाब्धि॑नोति यथापूर्॒वमु॑पैति

यत् पू॒तीकै॑र्वा पर्ण॑वल्कै॑र्वा ऽत॒ञ्च्यात् सौ॒म्यं तद्यत् क्व॑लै राक्ष॒सं
तद्यत् तण्डु॑लैर्वै॒श्वदे॑वं तद्यदा॒तञ्चने॑न मा॒नुषं॑ तद्-यद्-द॒ध्ना
तथ् सै॒न्द्रं द॒ध्ना ऽत॒नक्ति॑ – [] 19

2.5.3.5 - Padam

दधि॑ । हि । पू॒र्वम् । क्रि॒यते॑ । इति॑ । अना॑दृत्ये॒त्यना॑ – दृ॒त्य । तत् ।
शृ॒तस्य॑ । ए॒व । पू॒र्वस्य॑ । अवे॑ति । द्ये॒त् । इ॒न्द्रि॒यम् । ए॒व ।
अ॒स्मिन् । वी॒र्यम्॑ । श्रि॒त्वा । द॒ध्ना । उ॒परि॑ष्ठात् । धि॒नोति॑ ।
यथा॒पूर्व॑मिति॑ यथा – पू॒र्वम् । उपे॑ति । ए॒ति । यत् । पू॒तीकैः॑ ।
वा । पर्ण॑वल्कैरिति॑ पर्ण – वल्कैः॑ । वा ।
आ॒त॒ञ्च्यादि॑त्या – त॒ञ्च्यात् । सौ॒म्यम् । तत् । यत् । क्व॑लैः ।
राक्ष॑सम् । तत् । यत् । तण्डु॑लैः । वै॒श्वदे॑वमिति॑ वैश्व – दे॒वम् । तत् ।
यत् । आ॒त॒ञ्चने॑नेत्या॑ – त॒ञ्चने॑न । मा॒नुषम्॑ । तत् । यत् । द॒ध्ना ।
तत् । सै॒न्द्रमिति॑ स – इ॒न्द्रम् । द॒ध्ना । ए॒ति । त॒नक्ति॑ । 19 (50)

2.5.3.6

से॒न्द्र॒त्वा॒या॒-॥ग्नि॒हो॒त्रो॒च्छे॒षण॒म॒भ्या॒-त॒न॒क्ति॒ य॒ज्ञ॒स्य॒ सं॒त॒त्या॒ इ॒न्द्रो॒ वृ॒त्र॑
ह॒त्वा॒ परा॑ं॒ परा॒वत॑-म॒गच्छ॑-द॒पारा॒धमि॑ति॒ मन्य॑मान॒स्तं दे॒वताः॑
प्रै॒षमै॑च्छन्त् सो॒ऽब्र॑वीत् प्र॒जाप॑तिर्यः प्रथ॒मोऽनु॑विन्दति॒ तस्य॑ प्रथ॒मं
भा॒गधे॑यमि॒ति तं पि॒तरो॑ऽन्ववि॒न्दन् तस्मा॑त् पि॒तृभ्यः॑ पूर्वे॒द्युः क्रि॑यते
सो॒ऽमा॒वास्यां॑ प्र॒त्याऽ*ग॑च्छत् तं दे॒वा अ॒भि स॒मग॑च्छन्ता॒मा

वै नो-[] 20

2.5.3.6 - Padam

से॒न्द्र॒त्वा॒येति॑ से॒न्द्र - त्वा॒य ।
अ॒ग्नि॒हो॒त्रो॒च्छे॒षण॒मि॒त्यग्नि॑हो॒त्र - उ॒च्छे॒षण॒म् ।
अ॒भ्या॒त॒न॒क्ती॒त्यभि॑ - आ॒त॒न॒क्ति । य॒ज्ञ॒स्य॒ । सं॒त॒त्या॒ इति॑ सं-त॒त्यै ।
इ॒न्द्रः । वृ॒त्रम् । ह॒त्वा । परा॑म् । परा॒वत॑मि॒ति परा॑ - व॒तम् ।
अ॒गच्छ॑त् । अ॒पेति॑ । अ॒राध॑म् । इति॑ । म॒न्य॑मा॒नः । तम् । दे॒वताः॑ ।
प्रै॒षमि॑ति॒ प्र - ए॒षम् । ऐ॒च्छन् । सः । अ॒ब्र॑वीत् । प्र॒जाप॑तिरि॒ति
प्र॒जा - प॒तिः । यः । प्र॒थमः॑ ।

अनु॒विन्द॑तीत्यनु॒ – वि॒न्दति॑ । तस्य॑ । प्र॒थम॑म् । भा॒गधे॑यमिति॑
 भा॒ग – धे॑यम् । इति॑ । तम् । पि॒तरः॑ । अ॒न्विति॑ । अ॒विन्द॑न् ।
 तस्मा॑त् । पि॒तृभ्य॑ इति॑ पि॒तृ – भ्यः॑ । पूर्वे॑द्युः । क्रि॒यते॑ । सः ।
 अ॒मावा॑स्यामित्य॒मा – वा॑स्याम् । प्र॒ति । ए॒ति । अ॒गच्छ॑त् । तम् ।
 दे॒वाः । अ॒भि । स॒मिति॑ । अ॒गच्छ॑न्त । अ॒मा । वै । नः॑ । 20 (50)

2.5.3.7

अ॒द्य वसु॑ वस॒तीतीन्द्रो॑ हि दे॒वानां॑ वसु॑ तद॒मावा॑स्याया अ॒मावा॑स्यत्वं
 ब्र॒ह्मवा॑दिनो॑ वदन्ति॑ किं॒देव॑त्य॒ सां॒नाय्य॑मिति॑ वैश्व॒देव॑मिति॑ ब्रूयाद्-
 विश्वे॑ हि तद्दे॒वा भा॒गधे॑यम॒भि स॒मग॑च्छन्तेत्यथो॑ ख॒ल्वैन्द्र॑मित्ये॒व
 ब्रूया॑दिन्द्रं॒ वाव॑ ते तद्-भिष॒ज्यन्तो॑ऽभि स॒मग॑च्छन्तेति॑ । 21

2.5.3.7 - Padam

अ॒द्य । वसु॑ । वस॒ति । इति॑ । इन्द्रः॑ । हि । दे॒वाना॑म् । वसु॑ । तत् ।
 अ॒मावा॑स्याया इत्य॒मा – वा॑स्यायाः ।
 अ॒मावा॑स्यत्वमित्य॒मावा॑स्य – त्वम् । ब्र॒ह्मवा॑दिन इति॑ ब्र॒ह्म-वा॑दिनः ।
 वद॑न्ति । किं॒देव॑त्यमिति॑ किं – दे॒वत्य॑म् ।

सा॒नाय्यमि॒ति सां॑ – ना॒य्यम् । इति॑ । वै॒श्वदे॒वमि॒ति वैश्व॑ – दे॒वम् ।
 इति॑ । ब्रू॒यात् । वि॒श्वे ॥ हि॑ । तत् । दे॒वाः । भा॒गधे॒यमि॒ति
 भा॒ग – धे॒यम् । अ॒भीति॑ । स॒मग॑च्छन्तेति॑ सं – अ॒गच्छ॑न्त ।
 इति॑ । अथो॒ इति॑ । ख॒लु । ऐ॒न्द्रम् । इति॑ । ए॒व । ब्रू॒यात् । इन्द्र॑म् ।
 वा॒व । ते । तत् । भि॒षज्य॑न्तः । अ॒भि । स॒मिति॑ । अ॒गच्छ॑न्त ।
 इति॑ । 21 (42)

(दधि॑ – मे॒ ज॒घ्नुष॑ इन्द्रि॒यं वी॒र्यं॑ – मित्य॑ब्रवीदे॒तद॑स्मा –
 अ॒वदे॒यं – त॒नक्ति॑ – नो॒ – द्वि॒चत्वा॑रि॒ञ्शच्च॑) (A3)

2.5.4.1

ब्र॒ह्मवा॒दिनो॑ वदन्ति॑ स त्वै॑ दर्॒शपूर्ण॑मा॒सौ य॑जेत॑ य ए॒नौ से॒न्द्रौ
 य॑जेतेति॑ वैमृ॒धः पू॒र्णमा॑से ऽनु॒निर्वा॑प्यो भवति॑ तेन॑ पू॒र्णमा॑सः से॒न्द्र
 ऐ॒न्द्रं द॒ध्यमा॑वा॒स्यायां॑ तेना॑मावा॒स्या से॒न्द्रा य॑ ए॒वं वि॒द्वान्
 दर्॒शपूर्ण॑मा॒सौ य॑जते॑ से॒न्द्रावे॒वैनौ॑ यजते॑ श्वः श्वो॑ऽस्मा ई॒जाना॑य

व॒सी॒यो भ॒वति॑ दे॒वा वै यद्-य॒ज्ञे ऽकु॒र्वत॑तदसुरा अकु॒र्वत॑ ते दे॒वा

ए॒ता – [] 22

2.5.4.1 - Padam

ब्र॒ह्म॒वादि॑न इति॑ ब्र॒ह्म – वा॒दिनः॑ । वद॑न्ति । सः । तु । वै ।
दर्॒श॒पूर्ण॑मा॒सावि॑ति दर्॒श – पूर्ण॑मा॒सौ । य॒जेत॑ । यः । ए॒नौ ।
से॒न्द्रा॒वि॒ति स – इ॒न्द्रौ । य॒जेत॑ । इति॑ । वैमृ॑धः । पूर्ण॑मा॒स इति॑
पूर्ण॑ – मा॒से । अ॒नुनि॑र्वा॒प्य इत्य॑नु – नि॒र्वा॒प्यः । भ॒वति॑ । ते॒न ।
पूर्ण॑मा॒स इति॑ पूर्ण॑ – मा॒सः । से॒न्द्र इति॑ स – इ॒न्द्रः । ऐ॒न्द्रम् ।
दधि॑ । अ॒मावा॑स्याया॒मित्य॑मा – वा॒स्याया॑म् । ते॒न ।
अ॒मावा॑स्ये॒त्यामा॑ – वा॒स्या । से॒न्द्रे॒ति स – इ॒न्द्रा । यः । ए॒वम् ।
वि॒द्वान् । दर्॒श॒पूर्ण॑मा॒सावि॑ति दर्॒श – पूर्ण॑मा॒सौ । य॒जते॑ ।
से॒न्द्रा॒वि॒ति स – इ॒न्द्रौ । ए॒व । ए॒नौ । य॒जते॑ ।
श्वः श्व॑ इति॑ श्वः – श्वः । अ॒स्मै । ई॒जा॒नाय॑ । व॒सी॒यः । भ॒वति॑ ।

दे॒वाः । वै । यत् । य॒ज्ञे । अ॒कुर्व॑त । तत् । अ॒सुराः । अ॒कुर्व॑त । ते ।

दे॒वाः । ए॒ताम् । 22 (50)

2.5.4.2

–मि॒ष्टि–मप॑श्यन्–ना॒ग्नावै॑ष्णव–मे॒काद॑शकपालं॒ सर॑स्वत्यै चरुं॒
सर॑स्वते चरुं तां पौ॒र्णमा॑सं॒ स॒स्थाप्या॑नु नि॒रव॑पन् ततो॑ दे॒वा
अ॒भव॑न् परा॒सुरा॑ यो भ्रातृ॒व्यवा॑न्थस्याथ॒ स पौ॒र्णमा॑सं॒
स॒स्थाप्यै॑तामि॒ष्टिम॑नु निर्व॑पेत् पौ॒र्णमा॑सेनैव वज्रं॒ भ्रातृ॑व्याय
प्र॒ह॒त्या॒ग्नावै॑ष्णावे॒न दे॒वता॑श्च य॒ज्ञं च॒ भ्रातृ॑व्यस्य वृ॒द्धे मि॒थुना॑न्
प॒शून्थ॑ सा॒रस्व॑ताभ्यां॒ याव॑दे॒वास्या॑स्ति तथ् – [] 23

2.5.4.2 - Padam

इ॒ष्टिम् । अ॒प॒श्यन् । आ॒ग्नावै॑ष्णवमि॒त्याग्ना॑ – वै॒ष्णव॑म् ।
ए॒काद॑शकपालमि॒त्येका॑दश – क॒पाला॑म् । सर॑स्वत्यै । चरु॑म् ।
सर॑स्वते । चरु॑म् । ताम् । पौ॒र्णमा॑समि॒ति पौ॒र्ण – मा॑सम् ।
स॒स्थाप्ये॑ति सं – स्था॒प्य । अनु॑ । नि॒रिति॑ । अ॒वप॑न् । ततः॑ ।
दे॒वाः । अ॒भव॑न् । प॒रेति॑ । अ॒सुराः । यः ।

भ्रातृ॑व्य॒वा॒नि॒ति॒ भ्रातृ॑व्य – वा॒न् । स्यात् । सः । पौ॒र्ण॒मा॒स॒मि॒ति॒
 पौ॒र्ण – मा॒स॒म् । स॒॒स्था॒प्ये॒ति॒ सं-स्था॑प्य । ए॒ता॒म् । इ॒ष्टि॒म् । अ॒नु ।
 नि॒रि॒ति॒ । व॒पे॒त् । पौ॒र्ण॒मा॒से॒ने॒ति॒ पौ॒र्ण – मा॒से॒न । ए॒व । व॒ज्र॒म् ।
 भ्रातृ॑व्या॒य । प्र॒ह॒त्ये॒ति॒ प्र – ह॒त्य । आ॒ग्ना॒वै॒ष्ण॒वे॒ने॒त्या॒ग्ना-वै॒ष्ण॒वे॒न ।
 दे॒वताः॑ । च । य॒ज्ञ॒म् । च । भ्रातृ॑व्य॒स्य । वृ॒द्धे । मि॒थु॒ना॒न् । प॒शून् ।
 सा॒र॒स्व॒ता॒भ्या॒म् । या॒वत् । ए॒व । अ॒स्य । अ॒स्ति॒ । तत् । 23 (50)

2.5.4.3

सर्वं॑ वृ॒द्धे पौ॒र्ण॒मा॒सी॒मे॒व य॒जे॒त भ्रातृ॑व्य॒वा॒न्ना॒मा॒वा॒स्या॒ ह॒त्वा भ्रातृ॑व्यं
 नाऽऽप्या॑य॒यति॑ सा॒कं प्र॒स्था॒यी॒ये॒न य॒जे॒त प॒शु॒का॒मो॒य॒स्मै वा
 अ॒ल्पे॒नाऽऽह॑रन्ति॒ नाऽऽत्म॑ना तृ॒प्यति॑ नान्य॒स्मै द॒दाति॑ य॒स्मै म॒हता
 तृ॒प्य॒त्या॒त्म॒ना द॒दा॒त्य॒न्य॒स्मै म॒हता पू॒र्णं हो॑त॒व्यं तृ॒प्त ए॒वैन॑मिन्द्रः
 प्र॒जया॑ प॒शुभि॑स्तर्पयति॒ दारु॑पा॒त्रेण॑ जुहोति॒ न हि मृ॒न्म॒यमा॑हुति॒मान॒श
 औ॒दु॒म्बरं॑ – [] 24

2.5.4.3 - Padam

सर्वम् । वृद्धे । पौर्णमासीमिति पौर्ण – मासीम् । एव । यजेत ।
भ्रातृव्यवानिति भ्रातृव्य – वान् । न । अमावास्यामित्यमा-वास्याम् ।
हत्वा । भ्रातृव्यम् । न । एति । प्याययति । साकंप्रस्थायीयेनेति
साकं – प्रस्थायीयेन । यजेत । पशुकाम इति पशु – कामः ।
यस्मै । वै । अल्पोन । आहरन्तीत्या – हरन्ति । न । आत्मना ।
तृप्यति । न । अन्यस्मै । ददाति । यस्मै । महता । तृप्यति ।
आत्मना । ददाति । अन्यस्मै । महता । पूर्णम् । होतव्यम् । तृप्तः ।
एव । एनम् । इन्द्रः । प्रजयेति प्र – जया । पशुभिरिति पशु-भिः ।
तर्पयति । दारुपात्रेणेति दारु – पात्रेण । जुहोति । न । हि ।
मृन्मयमिति मृत् – मयम् । आहुतिमित्या – हुतिम् ।
आनशे । औदुम्बरम् । 24 (50)

2.5.4.4

भवत्यूर्वा उदुम्बर ऊर्क् पशव ऊर्जेवास्मा ऊर्जं पशूनव रुन्धे
नागतश्रीर्महेन्द्रं यजेत त्रयो वै गतश्रियः शुश्रुवान् ग्रामणी

रा॒ज॒न्य॒स्तेषां॑ म॒हेन्द्रो॑ दे॒वता॒ यो वै स्वां॑ दे॒वता॒मति॑ यज॒ते
प्र॒स्वायै॑ दे॒वता॒यैच्य॑वते॒ न परां॑ प्रा॒प्नोति॑ पा॒पीया॑न् भवति
सँव॒थ्सर॑-मिन्द्रं॑ य॒जेत॑ सँव॒थ्सर॑ हि व्र॒तं नाति॑ स्वै - [] 25

2.5.4.4 - Padam

भव॒ति । ऊ॒र्क् । वै । उ॒दु॒म्बरः॑ । ऊ॒र्क् । प॒शवः॑ । ऊ॒र्जा । ए॒व ।
अ॒स्मै । ऊ॒र्ज॑म् । प॒शून् । अ॒वेति॑ । रु॒न्धे । न ।
अ॒गत॑श्री॒रित्य॑गत - श्रीः । म॒हेन्द्र॑मि॒ति म॒हा - इन्द्र॑म् । य॒जेत॑ ।
त्रयः॑ । वै । ग॒तश्रि॑य इति ग॒त - श्रि॒यः । शु॒श्रु॒वान् । ग्रा॒मणी॑रि॒ति
ग्रा॒म - नीः । रा॒ज॒न्यः । तेषा॑म् । म॒हेन्द्र॑ इति म॒हा-इन्द्रः॑ । दे॒वता॑ ।
यः । वै । स्वा॑म् । दे॒वता॑म् । अ॒तिय॑जत इत्य॒ति - यज॑ते । प्रेति॑ ।
स्वा॑यै । दे॒वता॑यै । च्य॑वते॒ न । परा॑म् । प्रेति॑ । आ॒प्नोति॑ ।
पा॒पीया॑न् । भव॒ति । सँव॒थ्सर॑मि॒ति सं-व॒थ्सर॑म् । इन्द्र॑म् । य॒जेत॑ ।
सँव॒थ्सर॑मि॒ति सं - व॒थ्सर॑म् । हि । व्र॒तम् । न ।
अ॒तीति॑ । स्वा । 25 (50)

2.5.4.5

–वैनं॑ दे॒वते॑ज्यमा॒ना भू॒त्या इ॒न्धे व॑सी॒यान् भ॑वति सँव॒थ्स॒रस्य॑
पर॒स्ताद॑ग्नये॒ व्रत॑पतये॒ पुरो॑डाशम॒ष्टाक॑पालं॒ निर्व॑पेथ् सँव॒थ्स॒रमे॒वैनं॑
वृ॒त्रं ज॑घ्निवा॒ग्ँ स॒मग्नि॑-व्र॒तप॑ति-व्र॒तमा॑ ल॒म्भय॑ति ततोऽधि॒ कामं॑
य॒जेत । 26

2.5.4.5 - Padam

ए॒व । ए॒नम् । दे॒वता॑ । इ॒ज्यमा॑ना । भू॒त्यै । इ॒न्धे । व॑सी॒यान् ।
भ॑वति । सँव॒थ्स॒रस्ये॑ति सं – व॒थ्स॒रस्य॑ । पर॒स्तात् । अ॒ग्नये॑ ।
व्रत॑पतय इति व्रत – पतये । पुरो॑डाशम् ।
अ॒ष्टाक॑पालमि॒त्य॒ष्टा – क॒पालम् । निरि॑ति । व॒पेत् । सँव॒थ्स॒रमि॑ति
सं – व॒थ्स॒रम् । ए॒व । ए॒नम् । वृ॒त्रम् । ज॑घ्निवा॒ग्ँसम् । अ॒ग्निः ।
व्रत॑पतिरिति व्रत-पतिः । व्रतम् । एति । ल॒म्भय॑ति । ततः । अधी॑ति ।
का॒मम् । य॒जेत । 26 (30)

(ए॒तां – त – दौ॑दु॒म्बर॑ – स्वा – त्रि॒श॒च्च) (A4)

2.5.5.1

ना॒सो॒मया॒जी सं॒ नये॑द॒नाग॑तं॒ वा ए॒तस्य॑ प॒यो योऽसो॑मया॒जी
यद॒सो॒मया॒जी सं॒ नये॑त् परि॒मोष॑ ए॒व सोऽनृ॑तं॒ करो॑त्यथो॒ परै॒व सि॑च्यते
सो॒मया॒ज्यै॒व सं॒ नये॑त् प॒यो वै सो॒मः प॒यः सा॑नाय्यं॒ पय॑सै॒व प॒य
आ॒त्मन् ध॑त्ते॒ वि वा ए॒तं प्र॑जया॒ पशु॑भिर॒र्धय॑ति॒ वर्ध॑यत्यस्य॒ भ्रातृ॑व्यं
यस्य॑ ह॒विर्नि॑रु॒प्तं पु॒रस्ता॑च्चन्द्र॒मा – [] 27

2.5.5.1- Padam

न । अ॒सो॒मया॒जीत्य॑सो॒म – या॒जी । स॒मि॒ति । नये॑त् ।
अ॒नाग॑तमि॒त्यना॑ – ग॒तम् । वै । ए॒तस्य॑ । प॒यः । यः ।
अ॒सो॒मया॒जीत्य॑सो॒म – या॒जी । यत् । अ॒सो॒मया॒जीत्य॑सो॒म-या॒जी ।
सं॒नये॑दिति॒ सं – नये॑त् । परि॒मोष॑ इति॒ परि – मो॒षः । ए॒व । सः ।
अ॒नृ॒तम् । करो॑ति । अथो॒ इति॑ । प॒रेति॑ । ए॒व । सि॑च्यते ।
सो॒मया॒जीति॑ सो॒म – या॒जी । ए॒व । स॒मि॒ति । नये॑त् । प॒यः । वै ।
सो॒मः । प॒यः । सा॑नाय्यमि॒ति सां – ना॒य्यम् । प॒यसा॑ । ए॒व । प॒यः ।
आ॒त्मन् । ध॑त्ते । वी॒ति । वै । ए॒तम् । प्र॑जयेति॒ प्र – जया॑ ।

प॒शुभि॑रिति प॒शु – भिः । अ॒र्धय॑ति । व॒र्धय॑ति । अ॒स्य । भ्रा॑तृव्यम् ।
यस्य॑ । ह॒विः । नि॒रु॒प्तमि॑ति निः – उ॒प्तम् । पु॒रस्ता॑त् ।

॥
च॒न्द्रमाः॑ । 27 (50)

2.5.5.2

अ॒भ्यु॒देति॑ त्रे॒धा तण्डु॑लान् वि भ॒जेद्ये॑ म॒ध्यमाः॑ स्युस्तान॒ग्नये॑ दा॒त्रे
पु॒रोडा॑शम॒ष्टाक॑पालं कुर्याद्ये॑ स्थवि॒ष्ठास्ता॑निन्द्राय प्रदा॒त्रे दध॑ञ्चरुं
येऽणि॑ष्ठास्तान् विष्णवे॑ शिपि॒विष्टाय॑ शृ॒ते च॒रुम॑ग्निरेवा॒स्मै प्र॒जां
प्र॒ज॒नय॑ति वृ॒द्धामि॑न्द्रः प्रयच्छति य॒ज्ञो वै वि॒ष्णुः प॒शवः॑ शिपि॒र्यज्ञ॑
ए॒व प॒शुषु॑ प्र॒ति॒तिष्ठ॑ति न द्वे – [] 28

2.5.5.2 - Padam

अ॒भीति॑ । उ॒देती॑त्युत् – एति॑ । त्रे॒धा । तण्डु॑लान् । वी॒ति । भ॒जेत् ।
ये । म॒ध्यमाः॑ । स्युः । तान् । अ॒ग्नये॑ । दा॒त्रे । पु॒रोडा॑शम् ।
अ॒ष्टाक॑पालमि॒त्यष्टा॑ – क॒पालम् । कुर्या॑त् । ये । स्थवि॒ष्ठाः । तान् ।
इन्द्रा॑य । प्रदा॒त्र इति॑ प्र – दा॒त्रे । दध॑न् । च॒रुम् । ये । अ॒णिष्ठाः॑ ।
तान् । विष्णवे॑ । शिपि॒विष्टाये॑ति शिपि – वि॒ष्टाय॑ । शृ॒ते । च॒रुम् ।

अ॒ग्निः । ए॒व । अ॒स्मै । प्र॒जा॒मि॒ति॒ प्र – जा॒म् । प्र॒ज॒न॒य॒ती॒ति॒
प्र – ज॒न॒य॒ति॒ । वृ॒द्धा॒म् । इ॒न्द्रः । प्रै॒ति॒ । य॒च्छ॒ति॒ । य॒ज्ञः । वै ।
वि॒ष्णुः । प॒श॒वः । शि॒पिः । य॒ज्ञे । ए॒व । प॒शु॒षु । प्र॒ती॒ति॒ । ति॒ष्ठ॒ति॒ ।
न । द्वे इति । 28 (50)

2.5.5.3

य॒जे॒त॒ यत् पू॒र्व॒या॒ सं॒प्र॒ति॒ य॒जे॒तो॒त्त॒र॒या॒ छ॒म्ब॒ट्कु॒र्या॒द्यदु॒त्त॒र॒या॒ सम्प्र॒ति॒
य॒जे॒त॒ पू॒र्व॒या॒ छ॒म्ब॒ट्कु॒र्या॒न्नेष्टि॒र्भ॒व॒ति॒ न य॒ज्ञ॒स्तद॒नु॒ ह्री॒त॒मु॒ख्य॒प॒ग॒ल्भो॒
जा॒य॒त॒ ए॒का॒मे॒व य॒जे॒त॒ प्र॒ग॒ल्भो॒ऽस्य॒ जा॒य॒ते॒ ऽना॒दृ॒त्य॒ तद् द्वे ए॒व य॒जे॒त॒
य॒ज्ञ॒ मु॒ख॒मे॒व पू॒र्व॒या॒ऽऽल॒भ॒ते॒ य॒ज॒त॒ उत्त॒र॒या॒ दे॒व॒ता॒ ए॒व पू॒र्व॒या॒ ऽव॒रु॒न्ध
इ॒न्द्रि॒य॒-मु॒त्त॒र॒या॒ दे॒व॒लो॒क॒मे॒व – [] 29

2.5.5.3 - Padam

य॒जे॒त॒ । यत् । पू॒र्व॒या॒ । सं॒प्र॒ती॒ति॒ सं – प्र॒ति॒ । य॒जे॒त॒ ।
उ॒त्त॒र॒ये॒त्युत् – त॒र॒या॒ । छ॒म्ब॒ट् । कु॒र्या॒त् । यत् । उ॒त्त॒र॒ये॒त्युत् – त॒र॒या॒ ।
सं॒प्र॒ती॒ति॒ सं-प्र॒ति॒ । य॒जे॒त॒ । पू॒र्व॒या॒ । छ॒म्ब॒ट् । कु॒र्या॒त् । न । इष्टिः ।
भ॒व॒ति॒ । न । य॒ज्ञः । तत् । अ॒न्वि॒ति॒ । ह्री॒त॒मु॒खी॒ति॒ ह्री॒त – मु॒खी॒ ।

अ॒प॒ग॒ल्भ॒ इत्य॑प – ग॒ल्भः॑ । जा॒य॒ते॑ । ए॒काम्॑ । ए॒व । य॒जे॒त॑ ।
 प्र॒ग॒ल्भ॒ इति॑ प्र – ग॒ल्भः॑ । अ॒स्य॑ । जा॒य॒ते॑ । अ॒नादृ॒त्येत्य॑ना-दृ॒त्य॑ ।
 तत् । द्वे॑ इति॑ । ए॒व । य॒जे॒त॑ । य॒ज्ञमु॒खमि॑ति य॒ज्ञ – मु॒खम् । ए॒व ।
 पूर्॒वया॑ । आ॒ल॒भ॒त इत्या॑ – ल॒भ॒ते॑ । य॒जे॒ते॑ । उ॒त्तर॑येत्युत् – तर॒या ।
 दे॒वताः॑ । ए॒व । पूर्॒वया॑ । अ॒व॒रु॒न्ध इत्य॑व – रु॒न्धे॑ । इ॒न्द्रि॒यम् ।
 उ॒त्तर॑येत्युत् – तर॒या । दे॒वलो॒कमि॑ति दे॒व – लो॒कम् । ए॒व । 29 (50)

2.5.5.4

पूर्॒वया॑ऽभि॒जय॑ति म॒नुष्य॑लो॒कमु॒त्तर॑या भू॒यसो॑ य॒ज्ञक्र॒तूनु॑पै॒त्येषा॑
 वै सु॒म॒ना ना॒मेष्टि॑र्यम॒द्ये॒जानं॑ प॒श्चाच्च॑न्द्र॒मा अ॒भ्यु॑दे॒त्यस्मि॒न्नेवा॒स्मै
 लो॒केऽर्धु॑कं भ॒वति॑ दा॒क्षाय॑ण य॒ज्ञेन॑ सु॒वर्ग॑का॒मो य॒जे॒त पूर्ण॑मा॒से
 सं न॑येन्-मै॒त्राव॑रु॒ण्या ऽऽमि॑क्ष॒या ऽमा॒वास्या॑यां य॒जे॒त पूर्ण॑मा॒से वै
 दे॒वानां॑ सु॒तस्ते॑षा॒मेत॑म॒र्धमा॒सं प्र॑सु॒तस्ते॑षां मै॒त्राव॑रु॒णी
 व॒शाऽमा॒वास्या॑या-म॒नूब॑न्ध्या यत् – [] 30

2.5.5.4 - Padam

पूर्व॑या । अ॒भि॒ज॒य॒तीत्य॑भि – ज॒य॒ति । म॒नु॒ष्य॒लो॒कमि॑ति
म॒नु॒ष्य – लो॒कम् । उ॒त्त॒र॒येत्यु॑त् – त॒र॒या । भू॒य॒सः । य॒ज्ञ॒क्र॒तूनि॑ति
य॒ज्ञ – क्र॒तून् । उ॒पे॒ति । ए॒ति । ए॒षा । वै । सु॒म॒ना इति॑ सु – म॒नाः ॥
नाम॑ । इ॒ष्टिः । यम् । अ॒द्य । ई॒जा॒नम् । प॒श्चात् । च॒न्द्र॒माः ॥ अ॒भी॒ति ।
उ॒दे॒तीत्यु॑त् – ए॒ति । अ॒स्मिन् । ए॒व । अ॒स्मै । लो॒के । अ॒र्धु॒कम् ।
भ॒व॒ति । दा॒क्षाय॑ण॒य॒ज्ञेने॑ति दा॒क्षाय॑ण – य॒ज्ञेन॑ । सु॒व॒र्ग॒काम॑ इति
सु॒व॒र्ग – का॒मः । य॒जे॒त । पू॒र्ण॒मा॒स इति॑ पू॒र्ण – मा॒से । स॒मि॒ति ।
न॒ये॒त् । मै॒त्रा॒व॒रु॒ण्येति॑ मै॒त्रा – व॒रु॒ण्या । आ॒मि॒क्ष॒या ।
अ॒मा॒वा॒स्या॒यामि॑त्य॒मा – वा॒स्या॒याम् । य॒जे॒त । पू॒र्ण॒मा॒स इति॑
पू॒र्ण – मा॒से ॥ वै ॥ दे॒वा॒नाम् ॥ सु॒तः ॥ ते॒षाम् ॥ ए॒तम् ॥
अ॒र्ध॒मा॒समि॑त्य॒र्ध – मा॒सम् । प्र॒सु॒त इति॑ प्र – सु॒तः ॥ ते॒षाम् ॥
मै॒त्रा॒व॒रु॒णीति॑ मै॒त्रा – व॒रु॒णी । व॒शा ।

अ॒मा॒वा॒स्या॒या॒मि॒त्य॒मा – वा॒स्या॒या॒म् ।

अ॒नू॒ब॒न्ध्यै॒त्य॒नू – ब॒न्ध्या॑ । यत् । 30 (50)

2.5.5.5

पूर्वे॒द्यु र्यज॑ते वेदि॒मे॒व तत् क॑रोति यद् व॒थ्सान॑पाक॒रोति॑

सदो॑हवि॒र्धाने॑ ए॒व सं मि॑नोति यद्यज॑ते दे॒वैरे॒व सु॒त्यां सं पा॑दयति स

ए॒तम॑र्ध॒मासं॑ स॒धमा॑दं दे॒वैः सोमं॑ पिबति यन्-मै॒त्राव॑रु॒ण्या

ऽमि॑क्षया ऽमा॒वा॒स्या॒यां य॑जते यै॒वासौ दे॒वानां॑ व॒शाऽनू॒ब॒न्ध्या सो

ए॒वैषै॑तस्य सा॒क्षाद्वा ए॒ष दे॒वान॒भ्यारो॑हति य ए॒षां य॑ज्ञ – [] 31

2.5.5.5 - Padam

पूर्वे॒द्युः । यज॑ते । वेदि॒म् । ए॒व । तत् । क॑रोति । यत् । व॒थ्सान् ।

अपा॑करोतीत्यप – आ॒करो॑ति । सदो॑हवि॒र्धाने॑ इति सदः-हवि॒र्धाने॑ ।

ए॒व । समि॑ति । मि॒नोति॑ । यत् । यज॑ते । दे॒वैः । ए॒व । सु॒त्याम् ।

समि॑ति । पा॒दय॑ति । सः । ए॒तम् । अ॒र्धमा॑समित्य॒र्ध – मा॒सम् ।

स॒धमा॑दमिति स॒ध – मा॑दम् । दे॒वैः । सोम॑म् । पि॒बति॑ । यत् ।

मै॒त्राव॑रु॒ण्येति॑ मै॒त्रा – व॒रु॒ण्या । आ॒मि॑क्षया ।

अ॒मा॒वा॒स्या॒या॒मि॒त्य॒मा – वा॒स्या॒या॒म् । य॒ज॒ते । या । ए॒व । अ॒सौ ।
दे॒वा॒ना॒म् । व॒शा । अ॒नू॒ब॒न्ध्यै॒त्य॒नु – ब॒न्ध्या॑ । सो॒ इति॑ । ए॒व । ए॒षा ।
ए॒तस्य॑ । सा॒क्षा॒दि॒ति स – अ॒क्षा॒त् । वै । ए॒षः । दे॒वान् ।
अ॒भ्या॒रो॒ह॒ती॒त्य॒भि – आ॒रो॒ह॒ति । यः । ए॒षाम् । य॒ज्ञम् । 31 (50)

2.5.5.6

–म॒भ्या॒रो॒ह॒ति यथा॑ ख॒लु॒वै श्रे॒या॒न॒भ्या॒रू॒ढः का॒म॒य॒ते तथा॑ क॒रो॒ति
य॒द्य॒व॒वि॒ध्य॒ति पा॒पी॒या॒न् भ॒व॒ति य॒दि ना॒व॒वि॒ध्य॒ति स॒दृङ् व्या॒वृ॒त्का॒म
ए॒तेन॑ य॒ज्ञेन॑ य॒जेत॑ क्षु॒रप॒वि॒र्ह्ये॒ष य॒ज्ञ॒स्ता॒जक् पु॒ण्यो वा भ॒व॒ति प्र वा
मी॒य॒ते तस्यै॑तद्ब्र॒तं ना॒नृ॒तं व॒दे॒न्न मा॒ऽस॒म॒श्नी॒यान्न॑ स्त्र॒यमु॒पे॒यान्ना॒स्य
प॒ल्पू॒ल॒नेन॑ वा॒सः प॒ल्पू॒ल॒येयु॑ () – रे॒त॒द्धि दे॒वाः सर्वं॑ न कु॒र्व॒न्ति । 32

2.5.5.6 - Padam

अ॒भ्या॒रो॒ह॒ती॒त्य॒भि – आ॒रो॒ह॒ति । यथा॑ । ख॒लु । वै । श्रे॒या॒न् ।
अ॒भ्या॒रू॒ढ इत्य॑भि – आ॒रू॒ढः । का॒म॒य॒ते । तथा॑ । क॒रो॒ति । य॒दि ।
अ॒व॒वि॒ध्य॒ती॒त्य॒व – वि॒ध्य॒ति । पा॒पी॒या॒न् । भ॒व॒ति । य॒दि । न ।

अ॒ववि॒ध्यती॒त्यव॑ – वि॒ध्यति॑ । स॒दृङ्ङिति॑ स – दृङ् । व्या॒वृत्काम॑ इति॒
व्या॒वृत् – का॒मः । ए॒तेन॑ । य॒ज्ञेन॑ । य॒जेत॑ । क्षु॒रप॑वि॒रिति॑
क्षु॒र – प॒विः । हि । ए॒षः । य॒ज्ञः । ता॒जक् । पु॒ण्यः । वा । भ॒वति॑ ।
प्रे॒ति । वा । मी॒यते॑ । तस्य॑ । ए॒तत् । व्र॒तम् । न । अ॒नृत॑म् । व॒देत् ।
न । मा॒सम् । अ॒श्नी॒यात् । न । स्त्रि॒यम् । उपे॒ति । इ॒यात् । न ।
अ॒स्य । प॒ल्पू॒लने॑न । वा॒सः । प॒ल्पू॒लये॑युः () । ए॒तत् । हि । दे॒वाः ।
सर्व॑म् । न । कु॒र्वन्ति॑ । 32 (56) (च॒न्द्र॒मा – द्वे – दे॒वलो॒कमे॒व –
यद् – य॒ज्ञं – प॒ल्पू॒लये॑युः – षट् च) (A5)

2.5.6.1

ए॒ष वै दे॒वर॒थो यद् – दर्श॑पूर्ण॒मासौ॑ यो दर्श॑पूर्ण॒मासा॒विष्ट्वा॑ सो॒मेन॑
य॒जते॑ रथ॒स्पष्ट॑ ए॒वाव॒साने॑ वरे॑ दे॒वाना॑म॒व स्य॑त्ये॒तानि॑ वा अ॒ङ्गाप॑रू॒षि
सँव॑त्स॒रस्य॑ यद्दर्श॑पूर्ण॒मासौ॑ य एवं॑ वि॒द्वान् दर्श॑पूर्ण॒मासौ॑ य॒जते॑ –
ऽङ्गाप॑रू॒ष्येव॑ सँव॑त्स॒रस्य॑ प्र॒ति द॑धात्ये॒ ते वै सँव॑त्स॒रस्य॑

चक्षु॑षी॒ यद्दर्श॑पूर्णमासौ॒ य एवं॑ वि॒द्वान् दर्श॑पूर्णमासौ॒
यज॑ते॒ ताभ्या॑मे॒व सु॒वर्गं॑ लो॒कमनु॑ पश्य – [] 33

2.5.6.1 - Padam

ए॒षः । वै । दे॒वर॑थ इति॑ दे॒व – र॒थः । यत् ।
दर्॒श॒पूर्ण॒मासा॑विति॑ दर्॒श – पूर्ण॒मासौ॑ । यः ।
दर्॒श॒पूर्ण॒मासा॑विति॑ दर्॒श – पूर्ण॒मासौ॑ । इ॒ष्ट्वा । सो॒मेन॑ ।
यज॑ते । र॒थस्पष्ट॑ इति॑ र॒थ – स्पष्टे॑ । ए॒व । अ॒वसा॑न इत्य॑व॒साने॑ ॥
वरे॑ ॥ दे॒वाना॑म् । अवे॑ति । स्य॒ति । ए॒तानि॑ । वै ।
अ॒ङ्गाप॒रू॒षीत्य॑ङ्गा – प॒रू॒षि । सँव॑त्स॒रस्ये॑ति॒ सं – व॒त्स॒रस्य॑ ।
यत् । दर्॒श॒पूर्ण॒मासा॑विति॑ दर्॒श-पूर्ण॒मासौ॑ । यः । ए॒वम् । वि॒द्वान् ।
दर्॒श॒पूर्ण॒मासा॑विति॑ दर्॒श – पूर्ण॒मासौ॑ । यज॑ते ।
अ॒ङ्गाप॒रू॒षीत्य॑ङ्गा – प॒रू॒षि । ए॒व । सँव॑त्स॒रस्ये॑ति॒
सं – व॒त्स॒रस्य॑ । प्र॒तीति॑ । द॒धाति॑ । ए॒ते इति॑ । वै ।
सँव॑त्स॒रस्ये॑ति॒ सं – व॒त्स॒रस्य॑ । चक्षु॑षी॒ इति॑ । यत् ।

दर्शपूर्णमासाविति दर्श - पूर्णमासौ । यः । एवम् । विद्वान् ।
दर्शपूर्णमासाविति दर्श - पूर्णमासौ । यजते । ताभ्याम् । एव ।
सुवर्गमिति सुवः - गम् । लोकम् । अन्विति । पश्यति । 33 (50)

2.5.6.2

-त्येषा वै देवानां विक्रान्तिर्यद्-दर्शपूर्णमासौ य एवं विद्वान्
दर्शपूर्णमासौ यजते देवानामेव विक्रान्तिमनु विक्रमत एष वै
देवयानः पन्था यद्-दर्शपूर्णमासौ य एवं विद्वान् दर्शपूर्णमासौ
यजते य एव देवयानः पन्थास्तं समारोहत्येतौ वै देवानां हरी
यद्दर्शपूर्णमासौ य एवं विद्वान् दर्शपूर्णमासौ यजते यावेव देवानां
हरी ताभ्या - [] 34

2.5.6.2 - Padam

एषा । वै । देवानाम् । विक्रान्तिरिति वि - क्रान्तिः । यत् ।
दर्शपूर्णमासाविति दर्श - पूर्णमासौ । यः । एवम् । विद्वान् ।
दर्शपूर्णमासाविति दर्श - पूर्णमासौ । यजते । देवानाम् । एव ।
विक्रान्तिमिति वि - क्रान्तिम् । अनु । वीति । क्रमते । एषः । वै ।

दे॒व॒या॒न॒ इति॑ दे॒व – या॒नः॑ । प॒न्थाः॑ । यत् । द॒र्॒श॒पू॒र्ण॒मा॒सा॒वि॒ति॑
 द॒र्॒श – पू॒र्ण॒मा॒सौ । यः । ए॒वम् । वि॒द्वान् । द॒र्॒श॒पू॒र्ण॒मा॒सा॒वि॒ति॑
 द॒र्॒श – पू॒र्ण॒मा॒सौ । यज॑ते । यः । ए॒व । दे॒व॒या॒न॒ इति॑ दे॒व-या॒नः॑ ।
 प॒न्थाः॑ । तम् । स॒मा॒रो॒ह॒तीति॑ सं – आ॒रो॒ह॒ति॑ । ए॒तौ । वै । दे॒वा॒ना॒म् ।
 ह॒री इति॑ । यत् । द॒र्॒श॒पू॒र्ण॒मा॒सा॒वि॒ति॑ द॒र्॒श – पू॒र्ण॒मा॒सौ । यः ।
 ए॒वम् । वि॒द्वान् । द॒र्॒श॒पू॒र्ण॒मा॒सा॒वि॒ति॑ द॒र्॒श – पू॒र्ण॒मा॒सौ । यज॑ते ।
 यौ । ए॒व । दे॒वा॒ना॒म् । ह॒री इति॑ । ता॒भ्याम् । 34 (50)

2.5.6.3

–मे॒वै॒भ्यो॑ ह॒व्यं॑ व॒ह॒त्ये॒तद्वै॑ दे॒वा॒ना॒मा॒स्यं॑ यद्-दर्श॑पू॒र्ण॒मा॒सौ य ए॒वं
 वि॒द्वान् दर्श॑पू॒र्ण॒मा॒सौ यज॑ते सा॒क्षादे॒व दे॒वा॒ना॒मा॒स्ये जु॒होत्ये॒ष वै
 ह॒वि॒र्धा॒नी यो द॒र्॒श॒पू॒र्ण॒मा॒सया॒जी सा॒यं प्रा॒तर॒ग्नि॒हो॒त्रं जु॒होति॑ यज॑ते
 द॒र्॒श॒पू॒र्ण॒मा॒सा-व॒हर॒ह-ह॒वि॒र्धा॒निना॑ सु॒तो य ए॒वं वि॒द्वान्
 दर्श॑पू॒र्ण॒मा॒सौ यज॑ते ह॒वि॒र्धा॒न्यस्मीति॑ स॒र्वमे॒वा॒स्य ब॒र्हि॒ष्यं दत्तं॑
 भ॒वति॑ दे॒वा॒वा अ॒ह – [] 35

2.5.6.3 - Padam

ए॒व । ए॒भ्यः । ह॒व्यम् । व॒हति॑ । ए॒तत् । वै । दे॒वाना॑म् । आ॒स्यम् ।
यत् । द॒र्श॒पूर्ण॒मासा॑विति॑ द॒र्श-पूर्ण॒मासौ॑ । यः । ए॒वम् । वि॒द्वान् ।
द॒र्श॒पूर्ण॒मासा॑विति॑ द॒र्श - पूर्ण॒मासौ॑ । यज॑ते । सा॒क्षादि॑ति॑
स - अ॒क्षात् । ए॒व । दे॒वाना॑म् । आ॒स्यै॑ । जु॒होति॑ । ए॒षः । वै ।
ह॒वि॒र्धानी॑ति॑ ह॒विः - धा॒नी । यः ।
द॒र्श॒पूर्ण॒मास॑याजीति॑ द॒र्श॒पूर्ण॒मास - या॒जी । सा॒यंप्रा॑तरिति॑
सा॒यं - प्रा॒तः । अ॒ग्नि॒हो॒त्रमि॑त्य॒ग्नि - हो॒त्रम् । जु॒होति॑ । यज॑ते ।
द॒र्श॒पूर्ण॒मासा॑विति॑ द॒र्श - पूर्ण॒मासौ॑ । अ॒हर॒हरि॑त्य॒हः - अ॒हः ।
ह॒वि॒र्धानि॑नामिति॑ ह॒विः - धा॒निना॑म् । सु॒तः । यः । ए॒वम् । वि॒द्वान् ।
द॒र्श॒पूर्ण॒मासा॑विति॑ द॒र्श - पूर्ण॒मासौ॑ । यज॑ते । ह॒वि॒र्धानी॑ति॑
ह॒विः - धा॒नी । अ॒स्मि । इति॑ । स॒र्वम् । ए॒व । अ॒स्य ।
ब॒र्हिष्य॑म् । द॒त्तम् । भ॒वति॑ । दे॒वाः । वै । अ॒हः । 35 (50)

2.5.6.4

–र्य॒ज्ञि॒यं॒ ना॒वि॒न्दन्॒ ते॒ दर्श॑पूर्ण॒मा॒साव॑पुनन् तौ वा ए॒तौ पू॒तौ मे॒ध्यौ॒
यद्–दर्श॑पूर्ण॒मा॒सौ य ए॒वं वि॒द्वान् दर्श॑पूर्ण॒मा॒सौ यज॑ते पू॒तावे॒वैनौ॒
मे॒ध्यौ यज॑ते ना॒मावा॑स्यायां च पौर्ण॒मास्यां॑ च स्त्रि॒य–मु॒पेया॑द्य–
दु॒पेया॑न्निरिन्द्रि॒यः स्या॑त् सोम॒स्य वै रा॒ज्ञोऽर्ध॑मा॒सस्य॑ रात्र॒यः प॒त्नय॑
आ॒सन् ता॒साम॑मावा॒स्यां च पौर्ण॑मा॒सीं च नो॒पैत् – [] 36

2.5.6.4 - Padam

य॒ज्ञि॒यम् । न । अ॒वि॒न्दन् । ते । दर्॒श॒पूर्ण॑मा॒सावि॑ति
दर्॒श–पूर्ण॑मा॒सौ । अ॒पुन॑न् । तौ । वै । ए॒तौ । पू॒तौ । मे॒ध्यौ । यत् ।
दर्॒श॒पूर्ण॑मा॒सावि॑ति दर्॒श – पूर्ण॑मा॒सौ । यः । ए॒वम् । वि॒द्वान् ।
दर्॒श॒पूर्ण॑मा॒सावि॑ति दर्॒श–पूर्ण॑मा॒सौ । यज॑ते । पू॒तौ । ए॒व । ए॒नौ ।
मे॒ध्यौ । यज॑ते । न । अ॒मावा॑स्याया॒मित्य॑मा – वा॒स्यायाम् । च ।
पौर्ण॑मा॒स्यामि॑ति पौर्ण – मा॒स्याम् । च । स्त्रि॒यम् । उ॒पेति॑ । इ॒यात् ।
यत् । उ॒पेया॑दित्यु॒प – इ॒यात् । नि॒रिन्द्रि॑य इति निः – इन्द्रि॒यः ।
स्या॑त् । सोम॒स्य । वै । रा॒ज्ञः । अ॒र्धमा॑सस्येत्य॒र्ध – मा॒सस्य॑ ।

रा॒त्रयः॑ । प॒त्रयः॑ । आ॒सन् । ता॒साम् । अ॒मा॒वा॒स्यामि॒त्यमा॑-वा॒स्याम् ।
च । पौ॒र्ण॒मा॒सीमि॒ति पौ॒र्ण-मा॒सीम् । च । न । उ॒पेति॑ ।

ऐत् । 36 (50)

2.5.6.5

ते॑ ए॒नम॑भि॒ सम॑न॒ह्येतां॑ तं य॑क्ष्म॒ आ॒र्च्छद्-रा॒जानं॑ य॑क्ष्म॒ आ॒रदि॑ति
तद्-रा॒जय॑क्ष्म॒स्य ज॑न्म॒ यत् पा॑पी॒यान॑भ॒वत् तत् पा॑पय॒क्ष्मस्य॑
यज्जा॑याभ्याम॒विन्दत्॑ तज्जा॑ये॒न्यस्य॑ य ए॒वमे॑तेषां य॑क्ष्मा॒णां ज॑न्म
वे॒द नै॒नमे॑ते यक्ष्मा॒विन्द॑न्ति स ए॒ते ए॒व न॑म॒स्यन्नु॑पा॒धाव॑त् ते
अ॒ब्रू॒तां व॑रं वृ॒णाव॑हा आ॒वं दे॒वानां॑ भा॒गधे॑ अ॒सावा - [] 37

2.5.6.5 - Padam

ते॑ इति । ए॒नम् । अ॒भि । स॒मि॒ति । अ॒न॒ह्ये॒ताम् । तम् । य॑क्ष्मः ।
आ॒र्च्छ॑त् । रा॒जान॑म् । य॑क्ष्मः । आ॒रत् । इति॑ । तत् । रा॒जय॑क्ष्म॒स्येति॑
रा॒ज - य॑क्ष्म॒स्य । ज॑न्म । यत् । पा॑पी॒यान् । अ॒भव॑त् । तत् ।
पा॑पय॒क्ष्मस्ये॑ति पा॒प - य॑क्ष्म॒स्य । यत् । जा॑याभ्याम् । अ॒वि॒न्दत् ।
तत् । जा॑ये॒न्यस्य॑ । यः । ए॒वम् । ए॒तेषा॑म् । य॑क्ष्मा॒णाम् । ज॑न्म ।

वे॒द । न । ए॒नम् । ए॒ते । यक्ष्माः॑ । वि॒न्दन्ति॑ । सः । ए॒ते इति॑ । ए॒व ।
न॒मस्यन् । उ॒पेति॑ । अ॒धावत् । ते इति॑ । अ॒ब्रूता॑म् । व॒रम् ।
वृ॒णाव॒है । आ॒वम् । दे॒वाना॑म् । भा॒गधे॑ इति॑ भा॒ग – धे॑ ।

अ॒साव । 37 (50)

2.5.6.6

–व॒दधि॑ दे॒वा इ॒ज्यान्ता॑ इति॑ तस्मा॑त् स॒दृशी॑नां रा॒त्रीणा॑ममा॒वास्या॑यां
च पौ॒र्णमा॑स्यां च दे॒वा इ॒ज्यन्त॑ ए॒ते हि दे॒वानां॑ भा॒गधे॑ भा॒गधा॑ अ॒स्मै
म॒नुष्या॑ भवन्ति॑ य ए॒वं वै॒द भू॒तानि॑ क्षु॒धम॑घ्नन्थ् स॒द्यो म॒नुष्या॑
अ॒र्धमा॑से दे॒वा मा॒सि पि॒तरः॑ सँव॒त्सरे॑ व॒नस्प॑तय॒–स्तस्मा॑–द॒हर॑ह–
म॒नुष्या॑ अ॒शन॑मिच्छन्ते ऽर्ध॒मासे॑ दे॒वा इ॒ज्यन्ते॑ मा॒सि पि॒तृभ्यः॑ क्रियते॑
सँव॒त्सरे॑ व॒नस्प॑तयः फ॒लं () गृ॒ह्णन्ति॑ य ए॒वं वै॒द ह॒न्ति क्षु॒धं
भा॒तृव्यं॑ । 38

2.5.6.6 - Padam

आ॒वत् । अ॒धीति॑ । दे॒वाः । इ॒ज्यान्तै॑ । इति॑ । तस्मा॑त् । स॒दृशी॑नाम् ।
रा॒त्रीणा॑म् । अ॒मा॒वा॒स्याया॑मि॒त्यमा॑ – वा॒स्याया॑म् । च ।

पौ॒र्ण॒मा॒स्यामि॑ति॒ पौ॒र्ण॒-मा॒स्याम् । च॒ । दे॒वाः । इ॒ज्यन्ते॑ । ए॒ते इति॑ ।
हि । दे॒वाना॑म् । भा॒ग॒धे इति॑ भा॒ग - धे॑ । भा॒ग॒धा इति॑ भा॒ग - धाः॑ ।
अ॒स्मै । म॒नु॒ष्याः॑ । भ॒वन्ति॑ । यः । ए॒वम् । वे॒द । भू॒तानि॑ । क्षु॒धम् ।
अ॒घ्नन् । स॒द्यः । म॒नु॒ष्याः॑ । अ॒र्ध॒मा॒स इत्य॑र्ध - मा॒से ।
दे॒वाः । मा॒सि । पि॒तरः॑ । सँ॒व॒त्स॒र इति॑ सं - व॒त्स॒रे ।
व॒न॒स्प॒तयः॑ । तस्मा॑त् । अ॒हर॒हरि॑त्य॒हः - अ॒हः । म॒नु॒ष्याः॑ ।
अ॒ज्ञान॑म् । इ॒च्छन्ते॑ । अ॒र्ध॒मा॒स इत्य॑र्ध - मा॒से । दे॒वाः । इ॒ज्यन्ते॑ ।
मा॒सि । पि॒तृ॒भ्य इति॑ पि॒तृ - भ्यः॑ । क्रि॒यते॑ । सँ॒व॒त्स॒र इति॑
सं - व॒त्स॒रे । व॒न॒स्प॒तयः॑ । फ॒लम् () । गृ॒ह्णन्ति॑ ।
यः । ए॒वम् । वे॒द । ह॒न्ति । क्षु॒धम् । भ्रा॒तृ॒व्यम् । 38 (57)

(प॒श्य॒ति - ता॒भ्या -म॒ह - रै - द॒साव - फ॒लम्
- स॒प्त च॑) (A6)

2.5.7.1

दे॒वा वै न॑र्चि॒ न य॑जुष्य॒श्रय॑न्त॒ ते सा॑मन्ने॒वाश्र॑यन्त॒ हिं क॑रोति॒
सा॒मैवा॑क॒र्हिं क॑रोति॒ यत्रै॒व दे॒वा अ॑श्रयन्त॒ तत॑ ए॒वैना॑न् प्र॒युङ्क्ते॒
हिं क॑रोति॒ वाच॑ ए॒वैष॑ यो॒गो हिं क॑रोति॒ प्र॒जा ऐ॒व तद्-य॑ज॒मानः॑
सृ॒जते॒ त्रिः प्र॑थ॒माम॑न्वा॒ह त्रि॑रु॒त्तमां॑ य॒ज्ञस्यै॒व तद्ब॑र्.स – [] 39

2.5.7.1 - Padam

दे॒वाः । वै । न । ऋ॒चि । न । य॑जुषि । अ॒श्रय॑न्त । ते । सा॑मन् ।
ए॒व । अ॒श्रय॑न्त । हि॒म् । क॑रोति । सा॑म । ए॒व । अ॒कः । हि॒म् ।
क॑रोति । यत्र । ए॒व । दे॒वाः । अ॒श्रय॑न्त । ततः । ए॒व । ए॒नान् ।
प्रे॒ति । यु॒ङ्क्ते । हि॒म् । क॑रोति । वा॒चः । ए॒व । ए॒षः । यो॒गः ।
हि॒म् । क॑रोति । प्र॒जा इति॑ प्र – जाः । ए॒व । तत् । य॑ज॒मानः ।
सृ॒जते । त्रिः । प्र॑थ॒माम् । अ॒न्विति॑ । आ॒ह । त्रिः ।
उ॒त्तमा॑मित्युत् – त॒माम् । य॒ज्ञस्य॑ । ए॒व । तत् । ब॑र्.सम् । 39 (50)

2.5.7.2

न॒ह्यत्य॑प्र॒स्रञ्सा॑य सं॒तत॑मन्वा॒ह प्रा॑णा॒नाम॑न्नाद्यस्य सं॒तत्या॑ अथो
रक्ष॑साम॒पह॑त्यै रा॒थन्त॑रीं प्रथ॒माम॑न्वा॒ह रा॒थन्त॑रो वा अ॒यं लो॒क इ॒ममे॒व
लो॒कम॑भि॒जय॑ति त्रि॒र्वि गृ॑ह्णाति त्रय॒ इमे॒ लो॒का इ॒माने॒व लो॒कान॑भि॒
जय॑ति बा॒र्हती॑मु॒त्तमा॑-मन्वा॒ह बा॒र्हतो॑ वा अ॒सौ लो॒कोऽमु॑मे॒व
लो॒कम॑भि॒जय॑ति प्र वो - [] 40

2.5.7.2 - Padam

न॒ह्यति॑ । अ॒प्र॒स्रञ्सा॑येत्य॒प्र - स्रञ्सा॑य । सं॒तत॑मि॒ति सं - त॒तम् ।
अ॒न्विति॑ । आ॒ह । प्रा॑णा॒नामि॑ति प्र - अ॒नाना॑म् ।
अ॒न्नाद्य॑स्येत्य॒न्न - अ॒द्यस्य॑ । सं॒तत्या॑ इति सं - त॒त्यै । अथो॑ इति ।
रक्ष॑साम् । अ॒पह॑त्या इत्य॒प - ह॒त्यै । रा॒थन्त॑रीमि॒ति रा॒थं - त॒रीम् ।
प्रथ॑माम् । अ॒न्विति॑ । आ॒ह । रा॒थन्त॑र इति रा॒थं-त॑रः । वै । अ॒यम् ।
लो॒कः । इ॒मम् । ए॒व । लो॒कम् । अ॒भीति॑ । ज॒यति॑ । त्रिः । वी॒ति ।
गृ॑ह्णाति । त्रयः । इ॒मे । लो॒काः । इ॒मान् । ए॒व । लो॒कान् । अ॒भीति॑ ।
ज॒यति॑ । बा॒र्हती॑म् । उ॒त्तमा॑मित्यु॒त् - त॒माम् । अ॒न्विति॑ । आ॒ह ।

बार्॒हतः॑ । वै । अ॒सौ । लो॒कः । अ॒मुम् । ए॒व । लो॒कम् । अ॒भीति॑ ।

ज॒यति॑ । प्रेति॑ । वः । 40 (50)

2.5.7.3

वा॒जा इ॒त्यनि॑रुक्तां प्रा॒जाप॑त्यामन्वाह य॒ज्ञो वै प्र॒जाप॑तिर्य॒ज्ञमे॒व
प्र॒जाप॑तिमा र॒भते॑ प्र॒वो वा॒जा इ॒त्यन्वा॑हान्नं वै वा॒जोऽन्न॑मे॒वाव रु॒न्धे
प्र॒वो वा॒जा इ॒त्यान्वा॑ह तस्मा॑त् प्रा॒चीन॑ रेतो॑ धी॒यते॑ऽग्न आ या॒हि
वी॒तय॑ इ॒त्याह॑ तस्मा॑त्प्र॒तीचीः॑ प्र॒जा जा॑यन्ते प्र॒वो वा॒जा – [] 41

2.5.7.3 - Padam

वा॒जाः । इति॑ । अ॒नि॒रुक्ता॑मित्य॒निः – उ॒क्ताम् । प्रा॒जाप॑त्यामिति॑
प्रा॒जा – प॒त्याम् । अ॒न्विति॑ । आ॒ह । य॒ज्ञः । वै । प्र॒जाप॑तिरिति॑
प्र॒जा – प॒तिः । य॒ज्ञम् । ए॒व । प्र॒जाप॑तिमिति॑ प्र॒जा-प॒तिम् । एति॑ ।
र॒भते॑ । प्रेति॑ । वः । वा॒जाः । इति॑ । अ॒न्विति॑ । आ॒ह । अ॒न्नम् । वै ।
वा॒जः । अ॒न्नम् । ए॒व । अ॒वेति॑ । रु॒न्धे । प्रेति॑ । वः । वा॒जाः । इति॑ ।
अ॒न्विति॑ । आ॒ह । तस्मा॑त् । प्रा॒चीन॑म् । रेतः॑ । धी॒यते॑ । अ॒ग्ने ।

ए॒ति । या॒हि॒ । वी॒तये॑ । इ॒ति । आ॒ह॒ । तस्मा॑त् । प्र॒तीचीः॑ ।

प्र॒जा इति॑ प्र – जाः । जा॒यन्ते॑ । प्रेति॑ । वः । वा॒जाः । 41 (50)

2.5.7.4

इ॒त्यन्वा॑ह मा॒सा वै वा॒जा अ॒र्धमा॑सा अ॒भिद्य॑वो दे॒वा ह॒विष्म॑न्तो
गौ॒र्धृता॑ची य॒ज्ञो दे॒वाज्जि॑गाति यज॒मानः॑ सु॒म्नयु॑-रि॒दम॑सी॒दम॑सीत्ये॒व
य॒ज्ञस्य॑ प्रि॒यं धा॒माव॑ रुन्धे॒ यं का॒मये॑त॒ सर्व॑मायुरि॒यादि॑ति प्र वो वा॒जा
इति॑ तस्या॒नूच्या॑ग्न आ या॒हि वी॒तय॑ इति॒ संत॑तमु॒त्तर॑-म॒र्धर्च॑मा
ल॒भेत॑ – [] 42

2.5.7.4 - Padam

इति॑ । अ॒न्विति॑ । आ॒ह॒ । मा॒साः । वै । वा॒जाः । अ॒र्धमा॑सा
इ॒त्यर्ध॑ – मा॒साः । अ॒भिद्य॑व इ॒त्यभि॑ – द्य॒वः । दे॒वाः । ह॒विष्म॑न्तः ।
गौः । घृ॒ताची॑ । य॒ज्ञः । दे॒वान् । जि॒गाति॑ । यज॒मानः॑ । सु॒म्नयु॑रिति॑
सु॒म्न – युः । इ॒दम् । अ॒सि । इ॒दम् । अ॒सि । इति॑ । ए॒व । य॒ज्ञस्य॑ ।
प्रि॒यम् । धा॒म । अ॒वेति॑ । रुन्धे॒ । यम् । का॒मये॑त॒ सर्व॑म् । आ॒युः ।
इ॒यात् । इति॑ । प्रेति॑ । वः । वा॒जाः । इति॑ । तस्य॑ ।

अ॒नू॒च्येत्यनु॑ – उ॒च्य । अ॒ग्ने॑ । ए॒ति । या॒हि॒ । वी॒तये॑ । इति॑ ।

सं॒त॒त॒मि॒ति॒ सं – त॒तम् । उ॒त्तर॑मि॒त्युत् – त॒रम् ।

अ॒र्ध॒र्च॒मि॒त्य॒र्ध – ऋ॒चम् । ए॒ति । ल॒भे॒त । 42 (50)

2.5.7.5

प्रा॒णे॒नै॒वा॒स्या॒पा॒नं॑ दा॒धा॒र॒ सर्व॑मा॒यु॒रे॒ति॒ यो॒ वा अ॒र॒न्नि॒ꣳ सा॒मि॒धे॒नी॒नां॑
वै॒दा॒र॒न्ना॒वे॒व॒ भ्रा॒तृ॒व्यं॑ कुरु॒ते॒ꣳर्ध॒र्चो॑ सं द॒धा॒त्ये॒ष॒ वा अ॒र॒न्निः॑

सा॒मि॒धे॒नी॒नां॑ य॒ एवं॑ वै॒दा॒र॒न्ना॒वे॒व॒ भ्रा॒तृ॒व्यं॑ कुरु॒त॒ ऋ॒षे॒र्ऋ॒षे॒र्वा ए॒ता

नि॒र्मि॒ता॒ यथ्॑ सा॒मि॒धे॒न्य॒स्ता॒ यद॒सं॑ यु॒क्ताः॑ स्युः प्र॒जया॑ प॒शु॒भि॒

र्य॒ज॒मा॒न॒स्य॒ वि तिष्ठे॑र॒न्न॒र्ध॒र्चो॑ सं द॒धा॒ति॒ सं () यु॒न॒क्त्ये॒वै॒ना॒स्ता॒

अ॒स्मै सं॑यु॒क्ता॒ अ॒व॒रु॒द्धाः॑ सर्वा॒मा॒शि॒षं॑ दु॒हे । 43

2.5.7.5 - Padam

प्रा॒णे॒ने॒ति॒ प्र – अ॒ने॒न॑ । ए॒व । अ॒स्य॑ । अ॒पा॒न॒मि॒त्य॒प – अ॒नम् ।

दा॒धा॒र॒ । सर्व॑म् । आ॒युः॑ । ए॒ति॒ । यः॑ । वै । अ॒र॒न्नि॒म् ।

सा॒मि॒धे॒नी॒ना॒मि॒ति॒ सां – इ॒धे॒नी॒ना॒म् । वे॒द॒ । अ॒र॒न्ना॒ । ए॒व ।

भ्रा॒तृ॒व्यम् । कु॒रु॒ते॒ । अ॒र्ध॒र्चा॒वि॒त्य॒र्ध – ऋ॒चौ । स॒मि॒ति॒ ।

द॒धा॒ति॒ । ए॒षः॑ । वै । अ॒र॒न्निः॑ । सा॒मि॒धे॒नी॒ना॒मि॒ति॒ सां॑ – इ॒धे॒नी॒ना॒म् ।
यः । ए॒वम् । वे॒द । अ॒र॒न्नौ । ए॒व । भ्रा॒तृ॒व्यम् । कु॒रु॒ते ।
ऋ॒षेर् ऋ॒षे॒रि॒त्यृ॒षेः॑ – ऋ॒षेः॑ । वै । ए॒ताः । नि॒र्मि॒ता इति॑ निः-मि॒ताः ।
यत् । सा॒मि॒धे॒न्य इति॑ सां॑ – इ॒धे॒न्यः॑ । ताः । यत् । अ॒सं॑यु॒क्ता
इ॒त्यसं॑ – यु॒क्ताः॑ । स्युः । प्र॒जये॑ति प्र – जया॑ ।
प॒शुभि॑रिति प॒शु – भिः॑ । यज॑मानस्य । वी॒ति । ति॒ष्ठे॒रन् ।
अ॒र्ध॒र्चा॒वि॒त्यर्ध॑ – ऋ॒चौ । स॒मि॒ति॒ । द॒धा॒ति॒ । स॒मि॒ति॒ () । यु॒न॒क्ति॒ ।
ए॒व । ए॒नाः॑ । ताः । अ॒स्मै । सं॑यु॒क्ता इति॑ सं – यु॒क्ताः॑ । अ॒व॒रु॒द्धा
इ॒त्यव॑ – रु॒द्धाः॑ । सर्वा॑म् । आ॒शि॒षमि॒त्या – शि॒षम् ।
दु॒हे । 43 (60) (ब॒र्स – वै – जा॒यन्ते॑ प्र॒वो वा॒जा – ल॒भेत॑ –
द॒धा॒ति॒ सं – द॒श च॑) (A7)

2.5.8.1

अ॒य॒ज्ञो वा ए॒ष यो॑ऽसा॒मा॒ग्नि॒ आ या॑हि वी॒तय॑ इ॒त्याह॑ रथं॒तर॑स्यैष
व॒र्ण॒स्तं त्वा॑ स॒मि॒द्धि॒र॒ङ्गि॒र इ॒त्याह॑ वा॒मदे॒व्यस्यै॑ष व॒र्णो बृ॒हद॑ग्ने

सु॒वीर्य॑मि॒त्याह॑ बृ॒हत॑ ए॒ष वर्णो॑ यदे॒तं तृ॒चम॑न्वाह॑ य॒ज्ञमे॒व तथ्
साम॑न्वन्तं॑ क॒रोत्य॑ग्नि॒रमु॑ष्मिन् लो॒कआ॑सी॒दादि॒त्योऽस्मिन्॑ तावि॒मौ
लो॒काव॑शा॒न्ता – [] 44

2.5.8.1 - Padam

अ॒य॒ज्ञः । वै । ए॒षः । यः । अ॒सा॒मा । अ॒ग्ने॑ । ए॒ति॑ । या॒हि॑ । वी॒तये॑ ।
इ॒ति॑ । आ॒ह । रथ॑न्त॒रस्ये॑ति॒ रथं॑-त॒रस्य॑ । ए॒षः । वर्णः॑ । तम् । त्वा ।
स॒मि॒द्भिरि॑ति॒ समि॑त् – भिः । अ॒ङ्गि॒रः । इ॒ति॑ । आ॒ह ।
वा॒मदे॒व्यस्ये॑ति॒ वाम॑ – दे॒व्यस्य॑ । ए॒षः । वर्णः॑ । बृ॒हत् । अ॒ग्ने॑ ।
सु॒वीर्य॑मि॒ति सु॑ – वी॒र्यम् । इ॒ति॑ । आ॒ह । बृ॒हतः॑ । ए॒षः । वर्णः॑ ।
यत् । ए॒तम् । तृ॒चम् । अ॒न्वाहे॑त्यनु॒ – आ॒ह । य॒ज्ञम् । ए॒व । तत् ।
सा॒मन्व॑न्तमि॒ति सा॒मन् – व॒न्तम् । क॒रोति॑ । अ॒ग्निः । अ॒मुष्मि॑न् ।
लो॒के॑ । आ॒सीत् । आ॒दि॒त्यः । अ॒स्मिन् । तौ । इ॒मौ । लो॒कौ ।
अ॒शा॒न्तौ । 44 (50)

2.5.8.2

वा॒स्तां ते॒ दे॒वा अ॒ब्रु॒वन्ने॒तेमौ॑ वि॒ पर्यू॑हा॒मेत्य॒ग्न आ॒ या॒हि॒ वी॒तय॑
इ॒त्यस्मिन् लो॒के॑ अ॒ग्नि॒मद॒धु बृ॒हद॑ग्ने सु॒वीर्य॑मि॒त्यमु॒ष्मिन्
लो॒क आ॒दि॒त्यं ततो॑ वा इ॒मौ लो॒काव॑शा॒म्यतां॑ यदे॒वम॒न्वाहा॒नयो॑
लो॒कयोः॑ शा॒न्त्यै॑ शा॒म्यतो॑ऽस्मा इ॒मौ लो॒कौ य ए॒वं वे॒द पञ्च॑द॒श
सा॒मिधे॑नी॒रन्वा॒ह पञ्च॑द॒श – [] 45

2.5.8.2 - Padam

आ॒स्ताम् । ते । दे॒वाः । अ॒ब्रु॒वन् । ए॒ति । इ॒त । इ॒मौ । वि । प॒रीति॑ ।
ऊ॒हाम॑ । इ॒ति । अ॒ग्ने॑ । ए॒ति । या॒हि । वी॒तये॑ । इ॒ति । अ॒स्मिन् ।
लो॒के । अ॒ग्निम् । अ॒दधुः॑ । बृ॒हत् । अ॒ग्ने । सु॒वीर्य॑मि॒ति
सु – वी॒र्यम्॑ । इ॒ति । अ॒मुष्मिन् । लो॒के । आ॒दि॒त्यम् । ततः॑ । वै ।
इ॒मौ । लो॒कौ । अ॒शा॒म्यता॑म् । यत् । ए॒वम् । अ॒न्वाहे॑त्यनु – आ॒ह ।
अ॒नयोः॑ । लो॒कयोः॑ । शा॒न्त्यै॑ । शा॒म्यतः॑ । अ॒स्मै । इ॒मौ । लो॒कौ ।
यः । ए॒वम् । वे॒द । पञ्च॑द॒शेति॑ पञ्च – द॒श ।

सामि॑धेनीरिति॑ सां॒ – इ॒धेनीः॑ । अ॒न्विति॑ । आ॒ह ।

पञ्च॑द॒शेति॑ पञ्च॑ – द॒श । 45 (50)

2.5.8.3

वा अ॒र्धमा॒सस्य॑ रा॒त्रयो॑ऽर्ध॒मास॑शः सँ॒वत्सर॑ आ॒प्यते॑ ता॒सां त्री॑णि च
श॒तानि॑ ष॒ष्टिश्चाक्ष॑राणि ताव॑तीः सँ॒वत्सर॑स्य रा॒त्रयो॑ऽक्षर॑श्च ए॒व
सँ॒वत्सर॑मा॒प्नोति॑ नृ॒मेध॑श्च॒ परु॑च्छेपश्च ब्र॒ह्मवा॑द्यमवदेतामस्मिन्
दा॒रावा॑र्द्धेऽग्निं॑ ज॒नया॑व य॒तरो॑ नौ ब्र॒ह्मीया॑निति॑ नृ॒मेधो॑ऽभ्यव॑दथ् स
धू॒मम॑ज॒नय॑त् परु॑च्छेपो॒ ऽभ्यव॑दथ् सोऽग्नि॑म॒ज॒नय॑दृष
इ॒त्यब्र॑वीद्-[] 46

2.5.8.3 - Padam

वै । अ॒र्धमा॒सस्ये॑त्य॒र्ध – मा॒सस्य॑ । रा॒त्रयः॑ । अ॒र्धमा॒सश॑
इ॒त्य॒र्धमा॒स – शः॑ । सँ॒वत्सर॑ इति॑ सं – व॒त्सरः॑ । आ॒प्यते॑ ।
ता॒साम् । त्री॑णि । च । श॒तानि॑ । ष॒ष्टिः । च । अ॒क्षरा॑णि । ताव॑तीः ।
सँ॒वत्सर॑स्येति॑ सं – व॒त्सर॑स्य । रा॒त्रयः॑ । अ॒क्षर॑श्च इत्य॑क्षर-शः ।
ए॒व । सँ॒वत्सर॑मिति॑ सं – व॒त्सर॑म् । आ॒प्नोति॑ ।

नृ॒मे॒ध इति॑ नृ॒ – मे॒धः । च॒ । परु॑च्छेपः । च॒ । ब्र॒ह्म॒वा॒द्यमि॑ति
 ब्र॒ह्म – वा॒द्यम् । अ॒वदे॑ताम् । अ॒स्मिन् । दा॒रौ । आ॒र्द्रे । अ॒ग्निम् ।
 ज॒नया॑व । य॒तरः । नौ । ब्र॒ह्मी॒याम् । इति॑ । नृ॒मे॒ध इति॑ नृ॒ – मे॒धः ।
 अ॒भीति॑ । अ॒वद॑त् । सः । धू॒मम् । अ॒ज॒नय॑त् । परु॑च्छेपः ।
 अ॒भीति॑ । अ॒वद॑त् । सः । अ॒ग्निम् । अ॒ज॒नय॑त् । ऋ॒षे॑ । इति॑ ।

अ॒ब्रवी॑त् । 46 (50)

2.5.8.4

यथ् स॒माव॑द्वि॒द्व क॒था त्वम॑ग्नि॒मजी॑जनो॒ नाह॑मिति॒ सामि॑धे॒नीना॑मे॒वाहं
 ँ॒वर्णं॑ वे॒देत्य॑ब्रवी॒द्यद् घृ॒तव॑त् प॒दम॑नू॒च्यते॒ स आ॑सां॒ ँ॒वर्ण॑स्तं त्वा
 स॒मिद्धि॑रङ्गि॒र इत्या॑ह सामि॒धेनी॑ष्वे॒व तज्ज्यो॑ति॒ र्जन॑यति॒ स्त्रिय॑स्तेन
 यदृ॒चः स्त्रिय॑स्तेन॒ यद्-गा॑य॒त्रियः॒ स्त्रिय॑स्तेन॒ यथ् सामि॑धे॒न्यो
 वृष॑ण्वती-म॒न्वाह॑ – [] 47

2.5.8.4 - Padam

यथ् । स॒माव॑त् । वि॒द्व । क॒था । त्वम् । अ॒ग्निम् । अ॒जी॒जनः॑ । न ।
 अ॒हम् । इति॑ । सामि॒धेनी॑नामि॒ति सां॑ – इ॒धेनी॑नाम् । ए॒व । अ॒हम् ।

वर्णम् । वे॒द । इति॑ । अ॒ब्र॒वीत् । यत् । घृ॒त॒व॒दि॒ति॑ घृ॒त-व॒त् । प॒दम् ।
 अ॒नू॒च्य॒त॒ इत्य॑नु – उ॒च्य॒ते॑ । सः । आ॒साम् । वर्णः॑ । तम् । त्वा ।
 स॒मि॒द्धि॒रि॒ति॑ स॒मि॒त् – भिः॑ । अ॒ङ्गि॒रः । इति॑ । आ॒ह ।
 सा॒मि॒धे॒नी॒ष्वि॒ति॑ सां – इ॒धे॒नी॒षु । ए॒व । तत् । ज्यो॑तिः । ज॒न॒य॒ति॑ ।
 स्त्रि॒यः । ते॒न । यत् । ऋ॒चः । स्त्रि॒यः । ते॒न । यत् । गा॒य॒त्रि॒यः ।
 स्त्रि॒यः । ते॒न । यत् । सा॒मि॒धे॒न्य॑ इति॑ सां – इ॒धे॒न्यः॑ ।
 वृष॑ण्वतीमि॒ति॑ वृष॑ण् – व॒तीम् । अ॒न्वि॒ति॑ । आ॒ह । 47 (50)

2.5.8.5

ते॒न पु॒७स्व॒ती॒स्ते॒न॑ से॒न्द्रा॒स्ते॒न॑ मि॒थु॒ना अ॒ग्नि॒र्दे॒वानां॑ दू॒त आ॒सी॒दु॒श॒ना॑
 का॒व्यो॑ऽसु॒राणां॑ तौ प्र॒जा॒प॒तिं प्र॒श्न॒मै॒ता॒७ स प्र॒जा॒प॒ति॒र॒ग्निं दू॒तं
 वृ॒णी॒म॒ह इत्य॑भि॒ पर्या॑वर्त॒त ततो॑ दे॒वा अ॒भव॑न् प॒रा॑ऽसु॒रा य॒स्यै॒वं
 वि॒दु॒षो॑ऽग्निं दू॒तं वृ॒णी॒म॒ह इत्य॑न्वा॒ह भ॒व॒त्या॒त्म॒ना प॒रा॑ऽस्य॒ भ्रा॒तृ॒व्यो
 भ॒व॒त्य॒ध्व॒र॒व॒ती॒म॒न्वा॒ह॑ भ्रा॒तृ॒व्य॒मे॒वै॒त॒या – [] 48

2.5.8.5 - Padam

तेन॑ । पु॒ञ्च॑स्वतीः । तेन॑ । से॒न्द्रा इति॑ स – इ॒न्द्राः । तेन॑ । मि॒थु॒नाः ।
अ॒ग्निः । दे॒वाना॑म् । दू॒तः । आसी॑त् । उ॒शना॑ । का॒व्यः ।
अ॒सुरा॑णाम् । तौ । प्र॒जाप॑तिमिति॑ प्र॒जा – प॒तिम् । प्र॒श्नम् । ऐ॒ताम् ।
सः । प्र॒जाप॑तिरिति॑ प्र॒जा – प॒तिः । अ॒ग्निम् । दू॒तम् । वृ॒णीम॑हे ।
इति॑ । अ॒भीति॑ । पर्या॑वर्ततेति॑ परि – आ॑वर्तत । ततः॑ । दे॒वाः ।
अ॒भवन् । प॒रेति॑ । अ॒सुराः । यस्य॑ । ए॒वम् । वि॒दुषः॑ । अ॒ग्निम् ।
दू॒तम् । वृ॒णीम॑हे । इति॑ । अ॒न्वाहे॑त्यनु – आ॒ह । भ॒वति॑ । आ॒त्मना॑ ।
प॒रेति॑ । अ॒स्य । भ्रातृ॑व्यः । भ॒वति॑ । अ॒ध्वर॑वतीमित्य॑ध्वर – व॒तीम् ।
अ॒न्वति॑ । आ॒ह । भ्रातृ॑व्यम् । ए॒व । ए॒तया॑ । 48 (50)

2.5.8.6

ध्व॒रति॑ शो॒चिष्के॑ श॒स्तमी॑मह इत्या॑ह प॒वित्र॑मे॒वैतद् – य॑ज॒मान॑मे॒वैतया॑
प॒वय॑ति॒ समि॑द्धो अ॒ग्न आ॑हु॒तेत्या॑ह प॒रिधि॑मे॒वैतं॑ परि॑ द॒धात्य॑स्क॒न्दाय॑
य॒दत॑ ऊ॒र्ध्वम॑भ्याद॒ध्याद्य॑था ब॒हिः प॒रिधि॑ स्क॒न्दति॑ ता॒दृगे॑व तत् त्रयो॑

वा अ॒ग्नयो॑ ह॒व्यवा॑हनो॒ दे॒वानां॑ क॒व्यवा॑हनः पि॒तृणां॑ स॒हर॒क्षा
अ॒सुरा॑णां त ए॒तर्ह्या॑ श॒सन्ते॑ मां व॒रिष्य॑ते मा – [] 49

2.5.8.6 - Padam

ध्व॒रति॑ । शो॒चिष्के॑ श इति॑ शो॒चिः – के॒शः । तम् । ई॒महे॑ । इति॑ ।
आ॒ह । प॒वित्र॑म् । ए॒व । ए॒तत् । यज॑मानम् । ए॒व । ए॒तया॑ । प॒वय॑ति ।
स॒मिद्ध॑ इति॑ सं – इ॒द्धः । अ॒ग्ने । आ॒हुते॑त्या – हु॒त । इति॑ । आ॒ह ।
प॒रिधि॑मिति॑ प॒रि – धि॒म् । ए॒व । ए॒तम् । प॒रीति॑ । द॒धाति॑ ।
अ॒स्कन्दा॑य । यत् । अ॒तः । ऊ॒र्ध्वम् ।

अ॒भ्याद॑ध्यादि॒त्यभि॑ – आ॒दध्या॑त् । यथा॑ । ब॒हिः प॒रिधी॑ति
ब॒हिः – प॒रिधि॑ । स्क॒न्दति॑ । ता॒दृक् । ए॒व । तत् । त्रयः॑ । वै ।
अ॒ग्नयः॑ । ह॒व्यवा॑हन इति॑ ह॒व्य – वा॑हनः । दे॒वाना॑म् । क॒व्यवा॑हन
इति॑ क॒व्य – वा॑हनः । पि॒तृणा॑म् । स॒हर॒क्षा इति॑ स॒ह – र॒क्षाः ।
अ॒सुरा॑णाम् । ते । ए॒तर्हि॑ । एति॑ । श॒सन्ते॑ । माम् । व॒रिष्य॑ते ।

माम् । 49 (50)

2.5.8.7

–मिति॑ वृ॒णी॒ध्व॑ ह॒व्य॒वा॒ह॒न॒मि॒त्या॒ह॒ य॒ ए॒व॒ दे॒वा॒नां॑ तं वृ॒णी॒त
आ॒र्षे॒यं वृ॒णी॒ते ब॒न्धो॒रे॒व नै॒त्यथो॑ सं॒त॒त्यै॑ प॒र॒स्ता॒दर्वा॒चो वृ॒णी॒ते
तस्मा॑त् प॒र॒स्ता॒दर्वा॒ञ्चो॑ म॒नु॒ष्यान्॑ पि॒तरो॑ऽनु॒ प्र पि॒प॒ते । 50

2.5.8.7 - Padam

इति॑ । वृ॒णी॒ध्वम् । ह॒व्य॒वा॒ह॒न॒मि॒ति ह॒व्य॒ – वा॒ह॒नम् । इति॑ । आ॒ह॒ ।
यः । ए॒व । दे॒वा॒नाम् । तम् । वृ॒णी॒ते । आ॒र्षे॒यम् । वृ॒णी॒ते । ब॒न्धोः॑ ।
ए॒व । न । ए॒ति । अथो॑ इति॑ । सं॒त॒त्या इति॑ सं – त॒त्यै॑ । प॒र॒स्ता॒त् ।
अ॒र्वा॒चः । वृ॒णी॒ते । तस्मा॑त् । प॒र॒स्ता॒त् । अ॒र्वा॒ञ्चः । म॒नु॒ष्यान् ।
पि॒तरः॑ । अ॒नु । प्रेति॑ । पि॒प॒ते । 50 (29)

(अ॒शान्ता॑ – वा॒ह पञ्च॑द॒शा – ब्र॒वी – द॒न्वा॒है – तया॑ – व॒रि॒ष्यते॑
मा – मे॒का॒न्न॒त्रि॒ंश॒च्च) (A8)

5.9.1

अ॒ग्ने॒ महा॑ ह॒व्य॒वा॒ह॒न॒मि॒त्या॒ह॒ म॒हान् ह्ये॒ष य॒दग्नि॑ ब्रा॒ह्म॒णे॒त्या॒ह॒ ब्रा॒ह्म॒णो ह्ये॒ष
भा॒र॒ते॒त्या॒हैष॑ हि दे॒वेभ्यो॑ ह॒व्यं भ॑रति दे॒वे॒द्ध इ॒त्या॒ह॒ दे॒वा ह्ये॒त॒मै॒न्ध॒त

मन्वि॒द्ध इ॒त्याह॑ म॒नु॒र्ह्ये॒तमु॒त्तरो॑ दे॒वेभ्य॑ ऐ॒न्धर्षि॑ष्टु॒त इ॒त्याह॑र्षयो
ह्ये॒तम॑स्तुवन् वि॒प्रानु॑मदित इ॒त्याह॑ – [] 51

2.5.9.1 - Padam

अ॒ग्ने॑ । म॒हान् । अ॒सि॒ । इति॑ । आ॒ह । म॒हान् । हि॒ । ए॒षः । यत् ।
अ॒ग्निः । ब्रा॒ह्म॒ण॒ । इति॑ । आ॒ह । ब्रा॒ह्म॒णः । हि॒ । ए॒षः । भा॒रत॑ ।
इति॑ । आ॒ह । ए॒षः । हि॒ । दे॒वेभ्यः॑ । ह॒व्यम् । भ॒रति॑ । दे॒वे॒द्ध इति॑
दे॒व – इ॒द्धः । इति॑ । आ॒ह । दे॒वाः । हि॒ । ए॒तम् । ऐ॒न्ध॒त ।
मन्वि॒द्ध इति॑ म॒नु – इ॒द्धः । इति॑ । आ॒ह । म॒नुः । हि॒ । ए॒तम् ।
उ॒त्तर॑ इत्यु॒त् – त॒रः । दे॒वेभ्यः॑ । ऐ॒न्ध । ऋ॒षि॑ष्टु॒त इत्यृ॑षि – स्तु॒तः ।
इति॑ । आ॒ह । ऋ॒षयः॑ । हि॒ । ए॒तम् । अ॒स्तुव॑न् ।
वि॒प्रानु॑मदित इति॑ वि॒प्र – अ॒नु॒म॒दि॒तः । इति॑ । आ॒ह । 51 (50)

2.5.9.2

वि॒प्रा ह्ये॒ते यच्छु॑श्रु॒वाँसः॑ क॒वि॒श॒स्त इ॒त्याह॑ क॒वयो॑ ह्ये॒ते
यच्छु॑श्रु॒वाँसो॑ ब्र॒ह्म॒सँ॒शित॑ इ॒त्याह॑ ब्र॒ह्म॒सँ॒शितो॑ ह्येष॑ घृ॒ताह॑ व॒न
इ॒त्याह॑ घृ॒ताहु॒तिर्ह्य॑स्य प्रि॒यत॑मा प्र॒णीर्य॑ज्ञा॒नामि॒त्याह॑ प्र॒णीर्ह्येष॑ य॒ज्ञानाँ॑

र॒थी॒र॒ध्व॒रा॒णामि॒त्या॒है॒ष हि दे॒व॒र॒थोऽतू॒र्तो हो॒ते॒त्या॒ह न हो॒तं

कश्च॒न – [] 52

2.5.9.2 - Padam

वि॒प्राः॑ । हि । ए॒ते । यत् । शु॒श्रु॒वा॒ऽसः॑ । क॒वि॒श॒स्त इति॑

क॒वि – श॒स्तः॑ । इति॑ । आ॒ह । क॒वयः॑ । हि । ए॒ते । यत् ।

शु॒श्रु॒वा॒ऽसः॑ । ब्र॒ह्म॒स॒ऽशित॑ इति॑ ब्र॒ह्म – स॒ऽशितः॑ । इति॑ । आ॒ह ।

ब्र॒ह्म॒स॒ऽशित॑ इति॑ ब्र॒ह्म – स॒ऽशितः॑ । हि । ए॒षः । घृ॒ता॒ह॒व॒न इति॑

घृ॒त – आ॒ह॒व॒नः॑ । इति॑ । आ॒ह । घृ॒ता॒हु॒तिरिति॑ घृ॒त – आ॒हु॒तिः॑ ।

हि । अ॒स्य । प्रि॒य॒त॒मेति॑ प्रि॒य – त॒मा । प्र॒णी॒रिति॑ प्र – नीः॑ ।

य॒ज्ञा॒नाम्॑ । इति॑ । आ॒ह । प्र॒णी॒रिति॑ प्र–नीः॑ । हि । ए॒षः । य॒ज्ञा॒नाम्॑ ।

र॒थीः॑ । अ॒ध्व॒रा॒णाम्॑ । इति॑ । आ॒ह । ए॒षः । हि ।

दे॒व॒र॒थ इति॑ दे॒व – र॒थः॑ । अ॒तू॒र्तः॑ । हो॒ता॑ । इति॑ । आ॒ह । न । हि ।

ए॒तम् । कः॑ । च॒न । 52 (50)

2.5.9.3

तरति॑ तू॒र्णि॑ ह॒व्यवा॑डित्याह॑ सर्व॑ ह्येष॑ तरत्या॑स्पात्रं॑
जुहू॑र्दे॒वाना॑मित्याह॑ जुहू॑र्ह्येष॑ दे॒वानां॑ चम॒सो दे॒वपान॑ इत्याह॑ चम॒सो ह्येष॑
दे॒वपानो॑ऽरा॒ग् इवा॑ग्ने॒ नेमि॑र्दे॒वास्त्वं॑ परि॒भूर॑सीत्याह॑ दे॒वान् ह्येष॑
परि॒भूर्यद्-ब्रू॑यादा॒ वह॑ दे॒वान् दे॒वय॑ते॒ यज॑माना॒येति॑
भ्रातृ॑व्यमस्मै- [] 53

2.5.9.3 - Padam

तरति॑ । तू॒र्णिः॑ । ह॒व्यवा॑डिति॑ ह॒व्य - वाट् । इति॑ । आह॑ । सर्व॑म् ।
हि । ए॒षः । तरति॑ । आ॒स्पात्र॑म् । जुहूः॑ । दे॒वाना॑म् । इति॑ । आह॑ ।
जुहूः॑ । हि । ए॒षः । दे॒वाना॑म् । चम॒सः । दे॒वपान॑ इति॑ दे॒व - पानः॑ ।
इति॑ । आह॑ । चम॒सः । हि । ए॒षः । दे॒वपान॑ इति॑ दे॒व - पानः॑ ।
अ॒रान् । इ॒व । अ॒ग्ने । नेमिः॑ । दे॒वान् । त्वम् । परि॒भूरिति॑ परि-भूः ।
अ॒सि । इति॑ । आह॑ । दे॒वान् । हि । ए॒षः । परि॒भूरिति॑ परि - भूः ।
यत् । ब्रू॑यात् । एति॑ । वह॑ । दे॒वान् । दे॒वय॑त इति॑ दे॒व - यते॑ ।
यज॑मानाय । इति॑ । भ्रातृ॑व्यम् । अ॒स्मै । 53 (50)

2.5.9.4

जनये॑दा वह॑ दे॒वान् यज॑मानायेत्याह॑ यज॑मानमे॒वैतेन॑
वर्ध॑यत्यग्निम॒ग्न आ वह॑ सोम॒मा वहेत्याह॑ दे॒वता॑ ए॒व तद्-
यथा॑पूर्वमुप॑ ह्वयत॒ आ चा॒ग्ने दे॒वान् वह॑ सु॒यजा॑ च यज॑ जातवे॒द
इत्याहा॑ग्निमे॒व तथ् स॒ ऽश्यति॑ सो॒ऽस्य स॒ ऽशितो॑ दे॒वेभ्यो॑ ह॒व्यं
व॑हत्यग्नि॒र्होति॑ - [] 54

2.5.9.4 - Padam

जन॑येत् । ए॒ति । वह॑ । दे॒वान् । यज॑मानाय । इति॑ । आ॒ह ।
यज॑मानम् । ए॒व । ए॒तेन॑ । वर्ध॑यति । अ॒ग्निम् । अ॒ग्ने । ए॒ति । वह॑ ।
सोम॑म् । ए॒ति । वह॑ । इति॑ । आ॒ह । दे॒वताः॑ । ए॒व । तत् ।
यथा॑पूर्वमिति॑ यथा - पूर्वम् । उपे॑ति । ह्वय॑ते । ए॒ति । च । अ॒ग्ने ।
दे॒वान् । वह॑ । सु॒यजे॑ति सु - यजा॑ । च । यज॑ । जा॒तवे॒द इति॑
जा॒त-वे॒दः । इति॑ । आ॒ह । अ॒ग्निम् । ए॒व । तत् । समि॑ति । श्य॒ति ।
सः । अ॒स्य । स॒ ऽशित॑ इति॒ सं - शितः॑ । दे॒वेभ्यः॑ । ह॒व्यम् ।
व॑हति । अ॒ग्निः । हो॒ता । 54 (50)

2.5.9.5

–त्याहा॒ग्निर्वै॑ दे॒वाना॑ꣳ होता॒ य ए॒व दे॒वाना॑ꣳ होता॒ तं वृ॑णीते॒स्मो
व॒यमित्या॑हाऽऽत्मानमे॒व स॒त्त्वं ग॑मयति साधु ते यज॑मान
दे॒वते॑त्याहाऽऽशि॒षमे॑वैता॒मा शा॑स्ते॒ यद्ब्रू॑याद्–योऽग्नि॑ꣳ होता॒रम॑वृ॒था
इत्य॑ग्नि॒नोभ॑यतो॒ यज॑मानं॒ परि॑ गृह्णीयात् प्र॒मायु॑कः स्याद्–
यज॑मानदे॒वत्या॑ वै जुहू॒र्भ्रातृ॑व्य दे॒वत्यो॑प॒भृद् – [] 55

2.5.9.5 - Padam

इति॑ । आ॒ह । अ॒ग्निः । वै । दे॒वाना॑म् । होता॑ । यः । ए॒व ।
दे॒वाना॑म् । होता॑ । तम् । वृ॒णीते॑ । स्मः । व॒यम् । इति॑ । आ॒ह ।
आ॒त्मान॑म् । ए॒व । स॒त्त्वमि॑ति सत् – त्वम् । ग॒मय॑ति । सा॒धु । ते ।
यज॑मान । दे॒वता॑ । इति॑ । आ॒ह । आ॒शि॒षमि॑त्या – शि॒षम् । ए॒व ।
ए॒ताम् । एति॑ । शा॒स्ते । यत् । ब्रू॑यात् । यः । अ॒ग्निम् । होता॑रम् ।
अ॒वृ॒थाः । इति॑ । अ॒ग्निना॑ । उ॒भय॑तः । यज॑मानम् । प॒रीति॑ ।
गृह्णी॑यात् । प्र॒मायु॑क इति॑ प्र – मा॒यु॒कः । स्या॑त् ।

यज॑मान॒दे॒वत्ये॑ति यज॑मान – दे॒वत्या॑ । वै । जु॒हूः ।

भ्रातृ॑व्यदे॒वत्ये॑ति भ्रातृ॑व्य – दे॒वत्या॑ । उप॑भृदित्युप – भृत् । 55 (50)

2.5.9.6

यद्-द्वे॑ इ॒व ब्रू॑याद् भ्रातृ॑व्यमस्मै॑ जनये॑द् घृ॒तव॑तीमध्व॒र्यो
स्रु॒चमा॑ऽस्यस्वेत्या॒ह यज॑मान मे॒वैते॑न वर्ध॑यति दे॒वायु॑वमि॒त्याह॑ दे॒वान्
ह्ये॒षाऽव॑ति वि॒श्ववा॑रामि॒त्याह॑ वि॒श्वः॑ ह्ये॒षाऽव॑तीडाम॒है दे॒वाः॑
ई॒डे॒न्यान्म॑स्याम॒ नम॑स्यान् यजाम॒ यज्ञि॑यानि॒त्याह॑मनु॒ष्या वा ई॒डे॒न्याः॑
पि॒तरो॑ नम॑स्या दे॒वा य॒ज्ञिया॑ दे॒वता॑ ए॒व () तद्-य॑थाभा॒गं
य॑जति । 56

2.5.9.6 - Padam

यत् । द्वे॑ इति । इ॒व । ब्रू॑यात् । भ्रातृ॑व्यम् । अ॒स्मै । ज॒नये॑त् ।
घृ॒तव॑तीमि॒ति घृ॒त – व॒तीम् । अध्व॒र्यो इति॑ । स्रु॒चम् । ए॒ति ।
अ॒स्यस्व॑ । इति॑ । आ॒ह । यज॑मानम् । ए॒व । ए॒तेन॑ । वर्ध॑यति ।
दे॒वायु॑वमि॒ति दे॒व – यु॒वम् । इति॑ । आ॒ह । दे॒वान् । हि । ए॒षा ।
अ॒वति॑ । वि॒श्ववा॑रामि॒ति वि॒श्व-वा॑राम् । इति॑ । आ॒ह । वि॒श्वम् । हि ।

ए॒षा । अ॒वति॑ । ई॒डाम॑है । दे॒वान् । ई॒डे॒न्यान् । न॒मस्या॑म । न॒मस्या॑न् ।
य॒जाम॑ । य॒ज्ञिया॑न् । इति॑ । आ॒ह । म॒नुष्याः॑ ॥ वै । ई॒डे॒न्याः॑ ॥
पि॒तरः॑ । न॒मस्याः॑ ॥ दे॒वाः । य॒ज्ञियाः॑ ॥ दे॒वताः॑ ॥ ए॒व () । तत् ।
यथा॑भा॒गमि॑ति यथा – भा॒गम् । य॒जति॑ । 56 (53)

(वि॒प्रानु॑म॒दित॑ इ॒त्याह॑ – च॒ना – ऽस्मै॑ – हो॒तो – प॒भृद् –
दे॒वता॑ ए॒व – त्री॑णि च) (A9)

2.5.10.1

त्री॒ऽस्तृ॒चान॑नु ब्रू॒याद्-रा॒ज॒न्य॒स्य त्रयो॑ वा अ॒न्ये रा॒ज॒न्यात्॑ पु॒रुषा॑
ब्रा॒ह्म॒णो वै॒श्यः शू॒द्र॒स्ता॒ने॒वास्मा॑ अनु॒कान् करो॑ति पञ्च॒द॒शानु॑ ब्रू॒याद्-
रा॒ज॒न्य॒स्य पञ्च॒द॒शो वै रा॒ज॒न्यः॑ स्व ए॒वैन॑ऽस्तो॒मे प्र॑तिष्ठापयति
त्रि॒ष्टुभा॑ परि द॒ध्यादि॑न्द्रि॒यं वै त्रि॒ष्टु॒गिन्द्रि॒यका॑मः खलु॒ वै रा॒ज॒न्यो य॑जते
त्रि॒ष्टुभै॒वास्मा॑ इन्द्रि॒यं परि॑ गृ॒ह्णाति॑ यदि का॒मये॑त-[] 57

2.5.10.1 - Padam

त्रीन् । तृ॒चान् । अ॒न्विति॑ । ब्रू॒यात् । रा॒ज॒न्य॒स्य । त्रयः॑ । वै । अ॒न्ये ।
रा॒ज॒न्यात्॑ । पु॒रुषाः॑ । ब्रा॒ह्म॒णः । वै॒श्यः । शू॒द्रः । तान् । ए॒व ।

अ॒स्मै । अनु॒का॒नित्य॒नु – का॒न् । क॒रोति॑ । पञ्च॒द॒शेति॑
 पञ्च – द॒श । अ॒न्विति॑ । ब्रू॒यात् । रा॒ज॒न्यस्य॑ । पञ्च॒द॒श इति॑
 पञ्च–द॒शः । वै । रा॒ज॒न्यः । स्वे । ए॒व । ए॒नम् । स्तो॒मे॑ । प्र॒तीति॑ ।
 स्था॒पय॑ति । त्रि॒ष्टुभा॑ । प॒रीति॑ । द॒ध्यात् । इ॒न्द्रि॒यम् । वै । त्रि॒ष्टुक् ।
 इ॒न्द्रि॒यका॒म इती॑न्द्रि॒य – का॒मः । ख॒लु । वै । रा॒ज॒न्यः । य॒जते॑ ।
 त्रि॒ष्टुभा॑ । ए॒व । अ॒स्मै । इ॒न्द्रि॒यम् । प॒रीति॑ । गृ॒ह्णाति॑ । यदि॑ ।
 का॒मये॑त । 57 (50)

2.5.10.2

ब्र॒ह्मव॑र्च॒सम॒स्त्विति॑ गा॒य॒त्रि॒या परि॑ द॒ध्याद्–ब्र॒ह्मव॑र्च॒सं वै गा॒य॒त्री
 ब्र॒ह्मव॑र्च॒समे॒व भ॑वति स॒प्तद॒शानु॑ ब्रू॒याद्–वै॒श्यस्य॑ स॒प्तद॒शो वै
 वै॒श्यः स्व॑ ए॒वैन॑ स्तो॒मे॑ प्र॒ति ष्ठा॑पयति॒जग॑त्या परि॑ द॒ध्याज्जा॑गता वै
 प॒शवः॑ प॒शुका॒मः ख॒लु वै वै॒श्यो य॒जते॑ जग॑त्यै॒वास्मै॑ प॒शून् परि॑
 गृ॒ह्णात्ये॑ क॒वि॒ श॒तिम॑नु ब्रू॒यात् प्र॒तिष्ठा॑का॒मस्यै॑ क॒वि॒ शः॑ स्तो॒मानां॑
 प्र॒तिष्ठा॑ प्र॒तिष्ठि॑त्यै – [] 58

2.5.10.2 - Padam

ब्रह्मवर्चसमिति ब्रह्म-वर्चसम् । अस्तु । इति । गायत्रिया । परीति ।
दध्यात् । ब्रह्मवर्चसमिति ब्रह्म - वर्चसम् । वै । गायत्री ।
ब्रह्मवर्चसमिति ब्रह्म - वर्चसम् । एव । भवति ।
सप्तदशेति सप्त - दश । अन्विति । ब्रूयात् । वैश्यस्य ।
सप्तदश इति सप्त - दशः । वै । वैश्यः । स्वे । एव । एनम् ।
स्तोमे । प्रतीति । स्थापयति । जगत्या । परीति । दध्यात् । जागताः ।
वै । पशवः । पशुकाम इति पशु - कामः । खलु । वै । वैश्यः ।
यजते । जगत्या । एव । अस्मै । पशून् । परीति । गृह्णाति ।
एकविंशतिमित्येक - विंशतिम् । अन्विति । ब्रूयात् ।
प्रतिष्ठाकामस्येति प्रतिष्ठा - कामस्य । एकविंश इत्येक-विंशः ।
स्तोमानाम् । प्रतिष्ठेति प्रति - स्था ।
प्रतिष्ठित्या इति प्रति - स्थित्यै । 58 (50)

2.5.10.3

चतुर्विंशतिमनु॑ ब्रूयाद्-ब्रह्मवर्चस-कामस्य॑ चतुर्विंशत्यक्षरा॑
गायत्री॑ गायत्री॑ ब्रह्मवर्चसं॑ गायत्रियैवास्मै॑ ब्रह्मवर्चसमव॑ रुन्धे
त्रिंशतमनु॑ ब्रूयादन्नकामस्य॑ त्रिंशदक्षरा॑ विराडन्नं॑ विराड्
विराजैवस्मा॑ अन्नाद्यमव॑ रुन्धे द्वात्रिंशतमनु॑ ब्रूयात् प्रतिष्ठाकामस्य॑
द्वात्रिंशदक्षरा॑ ऽनुष्टुगनुष्टुप् छन्दसां॑ प्रतिष्ठा॑ प्रतिष्ठित्यै॑ षट्त्रिंशतमनु॑
ब्रूयात् पशुकामस्य॑ षट्त्रिंशदक्षरा॑ बृहती॑ बार्हताः॑ पशवो॑
बृहत्यैवास्मै॑ पशू - [] 59

2.5.10.3 - Padam

चतुर्विंशतिमिति॑ चतुः - विंशतिम्॑ । अन्विति॑ । ब्रूयात् ।
ब्रह्मवर्चसकामस्येति॑ ब्रह्मवर्चस - कामस्य॑ ।
चतुर्विंशत्यक्षरेति॑ चतुर्विंशति - अक्षरा॑ । गायत्री॑ ।
गायत्री॑ । ब्रह्मवर्चसमिति॑ ब्रह्म - वर्चसम्॑ । गायत्रिया॑ । एव॑ ।
अस्मै॑ । ब्रह्मवर्चसमिति॑ ब्रह्म - वर्चसम्॑ । अवेति॑ । रुन्धे॑ ।
त्रिंशतम्॑ । अन्विति॑ । ब्रूयात् । अन्नकामस्येत्यन्न - कामस्य॑ ।

त्रि॒ंश॒दक्ष॑रेति॒ त्रि॒ंश॒त् – अ॒क्ष॒रा । वि॒राडि॑ति वि – राट् । अ॒न्नम् ।
 वि॒राडि॑ति वि – राट् । वि॒राजे॑ति वि – राजा॑ । ए॒व । अ॒स्मै ।
 अ॒न्नाद्य॑मित्य॒न्न – अ॒द्यम् । अ॒वेति॑ । रु॒न्धे । द्वात्रि॑ंश॒तम् । अ॒न्विति॑ ।
 ब्रू॒यात् । प्र॒तिष्ठा॑का॒मस्ये॑ति प्र॒तिष्ठा – का॒मस्य॑ । द्वात्रि॑ंश॒दक्ष॑रेति
 द्वात्रि॑ंश॒त् – अ॒क्ष॒रा । अ॒नुष्टु॑गित्य॒नु – स्तुक् ।
 अ॒नुष्टु॑बित्य॒नु – स्तुप् । छ॒न्द॒साम् । प्र॒तिष्ठे॑ति प्र॒ति – स्था ।
 प्र॒तिष्ठि॑त्या इति प्र॒ति – स्थि॒त्यै । षट्त्रि॑ंश॒तमि॑ति षट्-त्रि॑ंश॒तम् ।
 अ॒न्विति॑ । ब्रू॒यात् । प॒शुका॑म॒स्येति॑ प॒शु – का॒मस्य॑ ।
 षट्त्रि॑ंश॒दक्ष॑रेति षट्त्रि॑ंश॒त् – अ॒क्ष॒रा । बृ॒हती ।
 बा॒र्ह॒ताः । प॒शवः॑ । बृ॒ह॒त्या । ए॒व । अ॒स्मै । प॒शून् । 59 (50)

2.5.10.4

–न॒व रु॒न्धे च॑तुश्च॒त्वारि॑ंश॒तम॑नु ब्रू॒यादि॑न्द्रि॒यका॑मस्य
 च॑तुश्च॒त्वारि॑ंश॒दक्ष॑रा त्रि॒ष्टु॒गिन्द्रि॒यं त्रि॒ष्टुप् त्रि॒ष्टुभै॑वा॒स्मा इन्द्रि॒यम॑व
 रु॒न्धे ऽष्टा॑च॒त्वारि॑ंश॒तम॑नु ब्रू॒यात् प॒शुका॑म॒स्याष्टा॑च॒त्वारि॑ंश॒दक्ष॑रा

जगती॑ जागताः॑ प॒शवो॑ जग॒त्यै॒वा॒स्मै॑ प॒शून्॒व रु॒न्धे॑ सर्वा॒णि
छन्दा॑ꣳस्यनु॑ ब्रूयाद्-बहु॒याजिनः॑ सर्वा॒णि वा ए॒तस्य॑ छन्दा॑ꣳस्य
वरु॒न्धानि॑ यो बहु॒याज्य॑परि॒मित॒मनु॑ ब्रूयाद॒परि॒मित॒स्या वरु॑ध्यै । 60

2.5.10.4 - Padam

अवे॑ति । रु॒न्धे॑ । चतु॑श्चत्वारि॒ंश॒तमि॑ति चतुः॑ - च॒त्वारि॒ंश॒तम् ।
अन्वि॑ति । ब्रू॒यात् । इन्द्रि॑य॒काम॒स्येतीन्द्रि॑य - का॒मस्य॑ ।
चतु॑श्चत्वारि॒ंश॒दक्ष॑रेति चतु॑श्चत्वारि॒ंश॒त् - अ॒क्षरा॑ । त्रि॒ष्टुक् ।
इन्द्रि॑यम् । त्रि॒ष्टुप् । त्रि॒ष्टुभा॑ । ए॒व । अ॒स्मै । इन्द्रि॑यम् । अवे॑ति ।
रु॒न्धे॑ । अ॒ष्टाच॑त्वारि॒ंश॒तमि॑त्य॒ष्टा - च॒त्वारि॒ंश॒तम् । अन्वि॑ति ।
ब्रू॒यात् । प॒शुका॑म॒स्येति॑ प॒शु - का॒मस्य॑ ।
अ॒ष्टाच॑त्वारि॒ंश॒दक्ष॑रेत्य॒ष्टाच॑त्वारि॒ंश॒त् - अ॒क्षरा॑ । जगती॑ ।
जागताः॑ । प॒शवः॑ । जग॒त्या । ए॒व । अ॒स्मै । प॒शून् । अवे॑ति ।
रु॒न्धे॑ । सर्वा॒णि । छन्दा॑ꣳसि । अन्वि॑ति । ब्रू॒यात् । बहु॒याजिन॑ इति॒
बहु॑ - या॒जिनः॑ । सर्वा॒णि । वै । ए॒तस्य॑ । छन्दा॑ꣳसि ।

अवरुद्धानीत्यव – रुद्धानि । यः । बहुयाजीति बहु – याजी ।
 अपरिमितमित्यपरि – मितम् । अन्विति । ब्रूयात् ।
 अपरिमितस्येत्यपरि – मितस्य । अवरुद्ध्या इत्यव – रुद्ध्यै । 60 (47)

(कामयेत – प्रतिष्ठित्यै – पशून्थ – सप्तचत्वारिंशच्च) (A10)

2.5.11.1

निवीतं मनुष्याणां प्राचीनावीतं पितॄणामुपवीतं देवानामुप व्ययते
 देवलक्ष्ममेव तत् कुरुते तिष्ठन्नवाह तिष्ठन् ह्याश्रुततरं वदति
 तिष्ठन्नन्वाह सुवर्गस्य लोकस्याभिजित्या आसीनो यजत्यस्मिन्नेव
 लोके प्रतितिष्ठति यत् क्रौञ्चमन्वाहाऽऽसुरं तद्-यन्मन्द्रं मानुषं
 तद्यदन्तरा तथ् सदेवमन्तराऽनूच्यं सदेवत्वाय विद्वांसो वै – [] 61

2.5.11.1 - Padam

निवीतमिति नि – वीतम् । मनुष्याणाम् । प्राचीनावीतमिति
 प्राचीन – आवीतम् । पितॄणाम् । उपवीतमित्युप – वीतम् ।
 देवानाम् । उपेति । व्ययते । देवलक्ष्ममिति देव – लक्ष्मम् । एव ।
 तत् । कुरुते । तिष्ठन् । अन्विति । आह । तिष्ठन् । हि ।

आश्रु॒त॒त॒र॒मि॒त्याश्रु॒त – त॒र॒म् । व॒द॒ति । ति॒ष्ठ॒न् । अ॒न्वि॒ति ।
आ॒ह । सु॒व॒र्ग॒स्ये॒ति सु॒वः – ग॒स्य । लो॒क॒स्य । अ॒भि॒जि॒त्या
इ॒त्य॒भि – जि॒त्यै । आ॒सी॒नः । य॒ज॒ति । अ॒स्मि॒न् । ए॒व । लो॒के ।
प्र॒ती॒ति । ति॒ष्ठ॒ति । य॒त् । क्रौ॒ञ्च॒म् । अ॒न्वा॒हे॒त्य॒नु–आ॒ह । आ॒सु॒र॒म् ।
त॒त् । य॒त् । म॒न्द्र॒म् । मा॒नु॒ष॒म् । त॒त् । य॒त् । अ॒न्त॒रा । त॒त् ।
स॒दे॒व॒मि॒ति स – दे॒व॒म् । अ॒न्त॒रा । अ॒नू॒च्य॒मि॒त्य॒नु – उ॒च्य॒म् ।
स॒दे॒व॒त्वा॒ये॒ति स॒दे॒व – त्वा॒य । वि॒द्वा॒ऽसः । वै । 61 (50)

2.5.11.2

पु॒रा हो॒ता॒रोऽभू॒वन् तस्मा॒द्–वि॒धृ॒ता अ॒ध्वानोऽभू॒वन् न प॒न्था॒नः
स॒म॒रु॒क्ष॒न्नन्त॒र्वे॒द्य॒न्यः पा॒दो भ॒व॒ति ब॒हिर्वे॒द्य॒न्योऽथा॒न्वा॒हा॒ध्व॒नां वि॒धृ॒त्यै
प॒थाम॒स॒ रो॒हा॒याथो भू॒तं॒चै॒व भ॒वि॒ष्य॒च्चा॒व रु॒न्धेऽथो प॒रि॒मि॒तं
चै॒वा॒प॒रि॒मि॒तं चा॒व रु॒न्धेऽथो ग्रा॒म्या॒श्चै॒व प॒शूना॒र॒ण्या॒श्चा॒व
रु॒न्धेऽथो – [] 62

2.5.11.2 - Padam

पुरा॑ । हो॒तारः॑ । अ॒भू॒वन् । तस्मा॑त् । वि॒धृ॒ता इति॑ वि – धृ॒ताः ।
अध्वा॑नः । अ॒भू॒वन् । न । पन्था॑नः । समि॑ति । अ॒रु॒क्षन् ।
अन्त॑र्वेदीत्यन्तः – वे॒दि । अ॒न्यः । पा॒दः । भव॑ति । ब॒हिर्वे॑दीति
ब॒हिः – वे॒दि । अ॒न्यः । अथ॑ । अ॒न्वि॑ति । आ॒ह । अध्वा॑नाम् ।
वि॒धृत्या॑ इति॑ वि – धृ॒त्यै । प॒थाम् । अ॒स॒र्गो॒हाये॑त्यसं – रो॒हाय॑ ।
अथो॑ इति॑ । भू॒तम् । च । ए॒व । भ॒वि॒ष्यत् । च । अ॒वे॒ति । रु॒न्धे ।
अथो॑ इति॑ । परि॑मितमि॒ति परि॑ – मि॒तम् । च । ए॒व ।
अ॒परि॑मितमि॒त्यपरि॑ – मि॒तम् । च ।
अ॒वे॒ति । रु॒न्धे । अथो॑ इति॑ । ग्रा॒म्यान् । च । ए॒व । प॒शून् ।
आ॒र॒ण्यान् । च । अ॒वे॒ति । रु॒न्धे । अथो॑ इति॑ । 62 (50)

2.5.11.3

दे॒वलो॑कं चै॒व म॑नुष्य लो॒कं चा॒भि ज॑यति दे॒वा वै सा॑मि॒धेनी॒रनू॑च्य
य॒ज्ञं ना॒न्वप॑श्यन्त्स प्र॒जाप॑तिस्तू॒ष्णी-मा॑घार॒मा ऽघा॑रयत् ततो॑ वै
दे॒वा य॒ज्ञम॑न्वप॑श्यन् यत् तू॒ष्णीमा॑घार-मा॒घार॑यति य॒ज्ञस्या॑नु॒ख्यात्या॑

अथो॑ सामि॒धेनी॒रेवा॒भ्य-न॒क्त्यलू॒क्षो॑ भवति॒ य ए॒वं वै॒दाथो॑

तर्प॑यत्ये॒वैना-स्तृ॑प्यति प्र॒जया॑ प॒शुभिः॑ - [] 63

2.5.11.3 - Padam

दे॒वलोक॑मिति॒ देव॑ - लो॒कम् । च॒ । ए॒व । म॒नुष्य॑लो॒कमिति॑

म॒नुष्य॑ - लो॒कम् । च॒ । अ॒भीति॑ । ज॒यति॑ । दे॒वाः । वै ।

सा॒मिधे॑नीरिति॒ सां - इ॒धेनीः॑ । अ॒नूच्ये॑त्यनु॒ - उच्य॑ ।

य॒ज्ञम् । न । अ॒न्विति॑ । अ॒पश्य॑न् । सः । प्र॒जाप॑तिरिति॒

प्र॒जा - प॑तिः । तू॒ष्णीम् । आ॒घार॑मित्या॒-घा॒रम् । ए॒ति । अ॒घार॑यत् ।

ततः॑ । वै । दे॒वाः । य॒ज्ञम् । अ॒न्विति॑ । अ॒पश्य॑न् । यत् । तू॒ष्णीम् ।

आ॒घार॑मित्या॒ - घा॒रम् । आ॒घार॑यतीत्या॒ - घा॒रय॑ति । य॒ज्ञस्य॑ ।

अ॒नुख्या॑त्या इत्यनु॒ - ख्या॑त्यै । अथो॑ इति॒ । सा॒मिधे॑नीरिति॒

सां - इ॒धेनीः॑ । ए॒व । अ॒भीति॑ । अ॒नक्ति॑ । अ॒लूक्षः॑ । भ॒वति॑ । यः ।

ए॒वम् । वै॒द । अथो॑ इति॒ । तर्प॑यति । ए॒व । ए॒नाः । तृ॑प्यति ।

प्र॒जये॑ति प्र - ज॒या । प॒शुभि॑रिति॒ प॒शु - भिः॑ । 63 (50)

2.5.11.4

–र्य॑ ए॒वं वे॒द॒ यदे॒क॒या ऽऽघा॒रये॒देकां॑ प्री॒णीया॒द्यद् द्वा॒भ्यां द्वे॑
प्री॒णीया॒द्यद् ति॒सृ॒भिर॑ति॒ तद्रे॒चये॑त्म॒नसा॑ ऽऽघा॒रय॑ति॒ मन॑सा
ह्य॒नाप्त॑मा॒प्यते॑ ति॒र्यञ्च॑मा॒ घा॒रय॑त्य॒छम्ब॑ट्कारं॒ वाक् च॑ मन॒श्चा
ऽऽर्ती॑येता॒महं॑ दे॒वेभ्यो॑ ह॒व्यं व॑हा॒मीति॑ वा॒गब्र॑वीद॒हं दे॒वेभ्य॑ इति॒
मन॑स्तौ प्र॒जाप॑तिं प्र॒श्नमै॑ता॒ऽसौऽब्र॑वीत् – [] 64

2.5.11.4 - Padam

यः । ए॒वम् । वे॒द॒ । यत् । ए॒क॒या । आ॒घा॒रये॒दित्या॑ – घा॒रये॑त् ।
ए॒काम् । प्री॒णीया॒त् । यत् । द्वा॒भ्याम् । द्वे॑ इति॒ । प्री॒णीया॒त् । यत् ।
ति॒सृ॒भिर॑ति॒ ति॒सृ – भिः॒ । अती॑ति । तत् । रे॒चये॑त् ।
मन॑सा । ए॒ति । घा॒रय॑ति । मन॑सा । हि । अ॒नाप्त॑म् । आ॒प्यते॑ ।
ति॒र्यञ्च॑म् । ए॒ति । घा॒रय॑ति । अ॒छम्ब॑ट्कार॒मित्य॑छम्बट् – का॒रम् ।
वाक् । च॒ । मनः॑ । च॒ । आ॒र्तीये॑ताम् । अ॒हम् । दे॒वेभ्यः॑ । ह॒व्यम् ।
व॒हामि॑ । इति॒ । वाक् । अ॒ब्रवी॑त् । अ॒हम् । दे॒वेभ्यः॑ । इति॒ । मनः॑ ।

तौ । प्र॒जाप॑तिमि॒ति प्र॒जा – प॒तिम् । प्र॒श्नम् । ऐ॒ताम् । सः ।

अब्र॑वीत् । 64 (50)

2.5.11.5

प्र॒जाप॑तिर्दू॒तीरे॒व त्वं॑ म॒नसो॑ऽसि॒ यद्धि॑ म॒नसा॑ ध्या॒यति॑ तद्वा॒चा वद॑तीति॒
तत् खलु॑ तु॒भ्यं न॑ वा॒चा जुह॑वन्नित्यब्र॑वीत् तस्मा॒न्मन॑सा प्र॒जाप॑तये॒
जुह॑तिम॒न इव॑ हि प्र॒जाप॑तिः प्र॒जाप॑तेरा॒प्त्यै परि॑धीन्त्सं मा॒र्ष्टि॑
पु॒नात्ये॑वैनान्त्रि॒र्मध्य॑मं त्रयो॒ वै प्रा॒णाः प्रा॒णाने॑वाभि॒ जय॑ति॒
त्रि॒र्दक्षि॑णार्ध्यं त्रय॑ – [] 65

2.5.11.5 - Padam

प्र॒जाप॑तिरि॒ति प्र॒जा – प॒तिः । दू॒तीः । ए॒व । त्वम् । म॒नसः । अ॒सि ।
यत् । हि । म॒नसा॑ । ध्या॒यति॑ । तत् । वा॒चा । वद॑ति । इति॑ । तत् ।
खलु॑ । तु॒भ्यम् । न । वा॒चा । जुह॑वन् । इति॑ । अब्र॑वीत् । तस्मा॒त् ।
म॒नसा॑ । प्र॒जाप॑तय॒ इति॑ प्र॒जा – प॒तये॑ । जुह॑ति । म॒नः । इव॑ । हि ।
प्र॒जाप॑तिरि॒ति प्र॒जा – प॒तिः । प्र॒जाप॑तेरि॒ति प्र॒जा – प॒तेः । आ॒प्त्यै ।
परि॑धीनिति॒ परि॑ – धीन् । समि॑ति । मा॒र्ष्टि॑ । पु॒नाति॑ । ए॒व । ए॒नान् ।

त्रिः । मध्यमम् । त्रयः । वै । प्राणा इति प्र – अनाः ।

प्राणानिति प्र – अनान् । एव । अभिति । जयति । त्रिः ।

दक्षिणार्ध्यमिति दक्षिण – अर्ध्यम् । त्रयः । 65 (50)

2.5.11.6

इमे लोका इमानेव लोकानभि जयति त्रिरुत्तरार्ध्यं त्रयो वै देवयानाः

पन्थानस्तानेवाभि जयति त्रिरुप वाजयति त्रयो वै देवल्लोका

देवल्लोकानेवाभि जयति द्वादश सं पद्यन्ते द्वादश मासाः सँवत्सरः

सँवत्सरमेव प्रीणात्यथो सँवत्सरमेवास्मा उप दधाति सुवर्गस्य

लोकस्य समष्ट्या आधारमा धारयति तिर इव – [] 66

2.5.11.6 - Padam

इमे । लोकाः । इमान् । एव । लोकान् । अभीति । जयति । त्रिः ।

उत्तरार्ध्यमित्युत्तर – अर्ध्यम् । त्रयः । वै । देवयाना इति

देव – यानाः । पन्थानः । तान् । एव । अभीति । जयति । त्रिः ।

उपेति । वाजयति । त्रयः । वै । देवल्लोका इति देव – लोकाः ।

देवल्लोकानिति देव – लोकान् । एव । अभीति । जयति ।

द्वाद॑श । स॒मि॒ति॒ । प॒द्य॒न्ते॑ । द्वाद॑श । मा॒साः । सँ॒व॒त्स॒र इति॑
सं – व॒त्स॒रः । सँ॒व॒त्स॒रमि॒ति सं – व॒त्स॒रम् । ए॒व । प्री॒णा॒ति॒ ।
अथो॑ इति॑ । सँ॒व॒त्स॒रमि॒ति सं – व॒त्स॒रम् । ए॒व । अ॒स्मै । उ॒पे॒ति॒ ।
द॒धा॒ति॒ । सु॒व॒र्ग॒स्ये॒ति सु॒वः – ग॒स्य॑ । लो॒क॒स्य॑ । स॒म॒ष्ट्या॑ इति॑
सं – अ॒ष्ट्यै॑ । आ॒घा॒रमि॒त्या॑ – घा॒रम् । ए॒ति॒ ।

घा॒रय॑ति । ति॒रः । इ॒व । 66 (50)

2.5.11.7

वै सु॒व॒र्गो लो॒कः सु॒व॒र्गमे॒वास्मै॑ लो॒कं प्र॒रो॒चय॑त्यृ॒जु॒मा घा॒रय॑त्यृ॒जु॒रिव॑
हि प्रा॒णः सं॒त॒त॒मा घा॒रय॑ति प्रा॒णा॒नाम॒न्नाद्य॑स्य सं॒त॒त्या अथो॑
रक्ष॑सा॒मप॑हत्यै यं का॒मये॑त प्र॒मायु॑कः स्या॒दिति॑ जि॒ह्वं तस्या॑ ऽऽघा॒रये॑त्
प्रा॒णमे॒वास्मा॑ज्जि॒ह्वं न॑यति ता॒जक् प्र॒मी॒यते॒शिरो॑ वा ए॒तद्-य॒ज्ञस्य॑
यदा॑घा॒र आ॒त्मा ध्रु॒वा – [] 67

2.5.11.7 - Padam

वै । सु॒व॒र्ग इति॑ सु॒वः – गः । लो॒कः । सु॒व॒र्गमि॒ति सु॒वः – गम् ।
ए॒व । अ॒स्मै । लो॒कम् । प्रे॒ति॒ । रो॒चय॑ति । ऋ॒जुम् । ए॒ति॒ । घा॒रय॑ति ।

ऋ॒जुः । इ॒व । हि । प्रा॒ण इति॑ प्र – अ॒नः । सं॒त॒त॒मि॒ति सं – त॒तम् ।

ए॒ति । घा॒र॒य॒ति । प्रा॒णा॒ना॒मि॒ति प्र – अ॒ना॒ना॒म् ॥

अ॒न्ना॒द्य॒स्ये॒त्य॒न्न – अ॒द्य॒स्य । सं॒त॒त्या इति॑ सं – त॒त्यै । अ॒थो इति॑ ।

र॒क्ष॒साम् । अ॒प॒ह॒त्या इत्य॑प – ह॒त्यै । यम् । का॒म॒ये॒त । प्र॒मा॒यु॒क इति॑

प्र – मा॒यु॒कः । स्या॒त् । इति॑ । जि॒ह्व॒म् । त॒स्य । ए॒ति । घा॒र॒ये॒त् ।

प्रा॒ण॒मि॒ति प्र–अ॒नम् । ए॒व । अ॒स्मा॒त् । जि॒ह्व॒म् । न॒य॒ति । ता॒ज॒क् ।

प्रे॒ति । मी॒य॒ते । शि॒रः । वै । ए॒त॒त् । य॒ज्ञ॒स्य । य॒त् ।

॥
आ॒घा॒र इत्या॑ – घा॒रः । आ॒त्मा । ध्रु॒वा । 67 (50)

2.5.11.8

ऽऽ॒घा॒र॒मा॒घा॒र्य॑ ध्रु॒वाꣳ स॒म॒न॒क्त्वा॒त्म॒न्ने॒व य॒ज्ञ॒स्य शि॒रः प्र॒ति

द॒धा॒त्य॒ग्नि॒र्दे॒वानां॑ दू॒त आ॒सीद् दै॒व्योऽसु॒राणां॑ तौ प्र॒जा॒प॒तिं प्र॒श्न॒मै॒ताꣳ

स प्र॒जा॒प॒ति ब्रा॒ह्म॒णम॑ब्रवीदे॒तद्वि ब्रू॒ही॒त्या श्रा॒व॒ये॒ती॒दं दे॒वाः शृ॒णु॒ते॒ति

वा॒व त॒दब्र॑वीद॒ग्नि॒र्दे॒वो हो॒ते॒ति य ए॒व दे॒वानां॑ त॒मवृ॑णीत

ततो॑ दे॒वा – [] 68

2.5.11.8 - Padam

आ॒घा॒र॒मि॒त्या॑ – घा॒र॒म् । आ॒घा॒र्ये॒त्या॑ – घा॒र्य॑ । ध्रु॒वा॒म् । स॒मि॒ति॑ ।
अ॒न॒क्ति॑ । आ॒त्म॒न् । ए॒व । य॒ज्ञ॒स्य॑ । शि॒रः॑ । प्र॒ती॒ति॑ । द॒धा॒ति॑ ।
अ॒ग्निः॑ । दे॒वा॒ना॒म् । दू॒तः॑ । आ॒सी॒त् । दै॒व्यः॑ । अ॒सु॒रा॒णाम्॑ । तौ ।
प्र॒जा॒प॒ति॒मि॒ति॑ प्र॒जा – प॒ति॒म् । प्र॒श्न॒म् । ऐ॒ता॒म् । सः॑ ।
प्र॒जा॒प॒ति॒रि॒ति॑ प्र॒जा – प॒तिः॑ । ब्रा॒ह्म॒ण॒म् । अ॒ब्र॒वी॒त् । ए॒तत् । वी॒ति॑ ।
ब्रू॒हि॑ । इ॒ति॑ । ए॒ति॑ । श्रा॒व॒य॒ । इ॒ति॑ । इ॒द॒म् । दे॒वाः॑ । शृ॒णु॒त॒ । इ॒ति॑ ।
वा॒व । तत् । अ॒ब्र॒वी॒त् । अ॒ग्निः॑ । दे॒वः॑ । हो॒ता॑ । इ॒ति॑ । यः॑ । ए॒व ।
दे॒वा॒ना॒म् । तम् । अ॒वृ॒णी॒त॒ । ततः॑ । दे॒वाः॑ । 68 (50)

2.5.11.9

अ॒भ॒व॒न् प॒रा॒ऽसु॒रा॒ य॒स्यै॒वं वि॒दु॒षः॑ प्र॒वरं॑ प्र॒वृ॒णते॑ भ॒व॒त्या॒त्म॒ना॒
प॒रा॒ऽस्य॑ भ्रा॒तृ॒व्यो॑ भ॒व॒ति॒ यद् ब्रा॒ह्म॒ण॒श्चा॒ ब्रा॒ह्म॒ण॒श्च॑ प्र॒श्न॒मे॒या॒तां॑
ब्रा॒ह्म॒णा॒या॒धि॑ ब्रू॒या॒द् यद् ब्रा॒ह्म॒णा॒या॒ध्या॒हा॒ ऽऽ॒त्म॒ने॒ऽध्या॒ह॒ यद् ब्रा॒ह्म॒णं॑
प॒रा॒हा॒ऽऽ॒त्म॒नं॑ प॒रा॒ऽऽह॑ तस्मा॒द् ब्रा॒ह्म॒णो॑ न प॒रो॒च्यः॑ । 69

2.5.11.9 - Padam

अ॒भवन् । प॒रेति॑ । अ॒सुराः । य॒स्य । ए॒वम् । वि॒दुषः । प्र॒वर॒मिति॑
प्र - व॒रम् । प्र॒वृण॑त इति॑ प्र - वृ॒णते॑ । भ॒वति॑ । आ॒त्मना॑ । प॒रेति॑ ।
अ॒स्य । भ्रा॒तृव्यः । भ॒वति॑ । यत् । ब्रा॒ह्मणः । च । अ॒ब्रा॒ह्मणः । च ।
प्र॒श्नम् । ए॒याता॑मित्या - इ॒याता॑म् । ब्रा॒ह्मणा॑य । अधी॑ति । ब्रू॒यात् ।
यत् । ब्रा॒ह्मणा॑य । अध्या॑हेत्यधि-आह । आ॒त्मने॑ । अधी॑ति । आह ।
यत् । ब्रा॒ह्मण॑म् । प॒राहे॑ति॒ परा॑ - आह । आ॒त्मान॑म् । प॒रेति॑ । आह ।
तस्मा॑त् । ब्रा॒ह्मणः । न । प॒रोच्य॑ इति॑ परा - उ॒च्यः । 69 (40)

(वा - आ॒र॒ण्या॑श्चाव॑ रु॒न्धेऽथो॑ - प॒शुभिः॑ - सोऽब्र॑वीद् -
दक्षि॑णार्ध्यं त्रय॑ - इव - ध्रु॒वा - दे॒वा - श्र॑त्वारि॒श्च) (A11)

2.5.12.1

आ॒युष्ट॑ आ॒युर्दा॑ अ॒ग्न आ॒प्याय॑स्व सं ते॒ ऽव ते॑ हे॒ड उ॒दुत्त॑मं
प्र॒णो दे॒व्या नो॑ दि॒वो ऽग॑ना वि॒ष्णू अ॒ग्नवि॑ष्णू इ॒मं मे॑ वरु॒ण तत्त्वा॑ या
म्यु दु॒त्यम् चि॒त्रम् । अ॒पां न॒पादा॑ ह्य॒स्थादु॑प॒स्थं जि॒ह्मना॑मूर्ध्वो

वि॒द्यु॒तं॑ व॒सानः॑ । तस्य॑ ज्येष्ठं॑ म॒हि॒मा॒नं॑ व॒ह॒न्ती॑ हि॒र॒ण्य॒व॒र्णाः॑

परि॑ य॒न्ति॑ य॒ह्वीः॑ । स-[] 70

2.5.12.1 - Padam

आ॒युः॑ । ते॒ । आ॒यु॒र्दा॑ इ॒त्या॒युः॑ – दाः॑ । अ॒ग्ने॑ । ए॒ति॑ । प्या॒य॒स्व॑ ।
स॒मि॒ति॑ । ते॒ । अ॒वे॒ति॑ । ते॒ । हे॒डः॑ । उ॒दि॒ति॑ । उ॒त्त॒म॒मि॒त्यु॒त् – त॒म॒म् ।
प्रे॒ति॑ । नः॑ । दे॒वी॑ । ए॒ति॑ । नः॑ । दि॒वः॑ । अ॒ग्ना॒वि॒ष्णू॑ इ॒त्य॒ग्ना॑ – वि॒ष्णू॑ ।
अ॒ग्ना॒वि॒ष्णू॑ इ॒त्य॒ग्ना॑ – वि॒ष्णू॑ । इ॒म॒म् । मे॒ । व॒रु॒ण॑ । तत् । त्वा॒ ।
या॒मि॑ । उ॒दि॒ति॑ । उ॒ । त्य॒म् । चि॒त्र॒म् । अ॒पा॒म् । न॒पा॒त् । ए॒ति॑ । हि॒ ।
अ॒स्था॒त् । उ॒प॒स्थ॒मि॒त्यु॒प – स्थ॒म् । जि॒ह्वा॒ना॒म् । ऊ॒र्ध्वः॑ ।
वि॒द्यु॒त॒मि॒ति॑ वि॒ – द्यु॒त॒म् । व॒सानः॑ । तस्य॑ । ज्येष्ठ॑म् । म॒हि॒मा॒न॒म् ।
व॒ह॒न्तीः॑ । हि॒र॒ण्य॒व॒र्णा॑ इ॒ति॑ हि॒र॒ण्य॑ – व॒र्णाः॑ । प॒री॒ति॑ । य॒न्ति॑ ।

य॒ह्वीः॑ । स॒मि॒ति॑ । 70 (50)

2.5.12.2

–म॒न्या॑ य॒न्त्यु॒प॑ य॒न्त्य॒न्याः॑ स॒मा॒न॒मूर्॒र्व॑ न॒द्यः॑ पृ॒ण॒न्ति॑ ।
त॒मू॒ शु॒चि॒ꣳ शु॒च॒यो॑ दी॒दि॒वाꣳ स॒म॒पां॑ न॒पा॒तं॑ प॒रि॒त॒स्थु॒रा॒पः॑ ।

तमस्मै॑रा यु॒वतयो॑ यु॒वानं॑ म॒र्मृज्य॑मानाः परि यन्त्यापः ।

स शु॒क्रेण॑ शि॒क्वना॑ रे॒वद॒ग्निर्दी॑दायानि॒ध्मो घृ॒तनि॑र्णिगप्सु ।

इन्द्रा॑वरुणयो॒रह॑स॒म्राजो॑रव आ वृ॒णे ।

ता नो॑ मृ॒डात॑ ईदृ॒शे । इन्द्रा॑वरुणा यु॒वम॑ध्व॒राय॑ नो – [] 71

2.5.12.2 - Padam

अ॒न्याः । य॒न्ति । उ॒पेति॑ । य॒न्ति । अ॒न्याः । स॒मा॒नम् । ऊ॒र्वम् ।

न॒द्यः । पृ॒णन्ति॑ । तम् । उ॒ । शु॒चिम् । शु॒चयः॑ । दी॒दिवा॑सम् ।

अ॒पाम् । न॒पातम् । प॒रीति॑ । त॒स्थुः । आ॒पः । तम् । अ॒स्मैराः॑ ।

यु॒वतयः॑ । यु॒वानम् । म॒र्मृज्य॑मानाः । प॒रीति॑ । य॒न्ति । आ॒पः ।

सः । शु॒क्रेण॑ । शि॒क्वना॑ । रे॒वत् । अ॒ग्निः । दी॒दाय॑ । अ॒निध्मः॑ ।

घृ॒तनि॑र्णिगिति॑ घृ॒त – नि॒र्णिक् । अ॒प्स्वि॒त्यप् – सु॒ ।

इन्द्रा॑वरुणयो॒रितीन्द्रा॑ – वरुणयोः । अ॒हम् । स॒म्राजो॑रिति॑

सं – रा॒जोः॑ । अ॒वः । ए॒ति । वृ॒णे । ता । नः । मृ॒डातः॑ । ईदृ॒शे॑ ।

इन्द्रा॑वरुणे॒तीन्द्रा॑ – वरुणा॑ । यु॒वम् । अ॒ध्व॒राय॑ । नः । 71 (50)

2.5.12.3

वि॒शो॑ ज॒नाय॑ म॒हि श॒र्म य॑च्छ॒तम् । दी॒र्घ॑प्र॒यज्यु॑म॒ति यो॑ व॒नुष्य॑ति
व॒यं ज॒येम॑ पृ॒तना॑सु दू॒ढ्यः॑ । आ नो॑मि॒त्रावरु॑णा प्र॒बाह॑वा ।
त्वं नो॑ अ॒ग्ने व॑रुणस्य वि॒द्वान् दे॒वस्य॑ हे॒डोऽव॑ या॒सि सी॑ष्ठाः ।
यजि॑ष्ठो वह्नि॒ तमः॑ शो॒शुचा॑नो वि॒श्वा द्वे॑षा॒सि प्र॑मु॒मुग्ध्य॑स्मत् ।
स त्वं॑नो अ॒ग्नेऽव॑मो भवो॒ती ने॑दिष्ठो अ॒स्या उ॒षसो॑ व्यु॒ष्टौ ।
अ॒व य॑क्ष्व नो॒ वरु॑ण - [] 72

2.5.12.3 - Padam

वि॒शो । ज॒नाय॑ । म॒हि । श॒र्म । य॑च्छ॒तम् । दी॒र्घ॑प्र॒यज्यु॑म॒ति
दी॒र्घ - प्र॒यज्यु॑म् । अ॒तीति॑ । यः । व॒नुष्य॑ति । व॒यम् । ज॒येम॑ ।
पृ॒तना॑सु । दू॒ढ्यः । ए॒ति । नः । मि॒त्रावरु॑णेति मि॒त्रा - व॒रुणा॑ ।
प्रेति॑ । बा॒हवा॑ । त्वम् । नः । अ॒ग्ने । व॑रुणस्य । वि॒द्वान् । दे॒वस्य॑ ।
हे॒डः । अ॒वेति॑ । या॒सि सी॑ष्ठाः । यजि॑ष्ठः । वह्नि॒ तम॑ इति वह्नि॒-तमः॑ ।
शो॒शुचा॑नः । वि॒श्वा । द्वे॑षा॒सि । प्रेति॑ । मु॒मुग्धि॑ । अ॒स्मत् । सः ।
त्वम् । नः । अ॒ग्ने । अ॒वमः॑ । भव॑ । ऊ॒ती । ने॑दिष्ठः । अ॒स्याः ।

उ॒षसः॑ । व्यु॒ष्टा॒वि॒ति॒ वि॒ – उ॒ष्टौ॑ । अ॒वे॒ति॒ । य॒क्ष्व॒ । नः॑ ।

वरु॒णम् । 72 (50)

2.5.12.4

ररा॒णो वी॒हि मृ॒डीक॑म् सु॒हवो॑ न ए॒धि ।

प्रप्रा॒यम॒ग्नि॒र्भर॑तस्य शृ॒ण्वे वि॒ यथ् सूर्यो॑ न रोच॑ते बृ॒हद्भाः॑ ।

अ॒भि यः पू॒रुं पृ॑तनासु त॒स्थौ दी॒दाय॑ दै॒व्यो अ॒ति॒थिः शि॒वो नः॑ ।

प्र ते॑ यक्षि॒ प्र त इ॒यमि॑ मन्म॒ भुवो॑ यथा व॒न्द्यो नो॑ ह॒वेषु॑ ।

ध॒न्वन्नि॒व प्र॒पा अ॒सि त्वम॑ग्न इ॒यक्ष॑वे पू॒र्वे प्र॒त्न रा॒जन् । 73

2.5.12.4 - Padam

ररा॒णः । वी॒हि । मृ॒डीक॑म् । सु॒हव॑ इति सु – ह॒वः । नः॑ । ए॒धि ।

प्रप्रे॑ति प्र – प्र । अ॒यम् । अ॒ग्निः । भ॒रत॑स्य । शृ॒ण्वे । वी॒ति । यत् ।

सूर्यः॑ । न । रोच॑ते । बृ॒हत् । भाः॑ । अ॒भीति॑ । यः । पू॒रुम् ।

पृ॑तनासु । त॒स्थौ । दी॒दाय॑ । दै॒व्यः । अ॒ति॒थिः । शि॒वः । नः॑ । प्रे॑ति ।

ते । यक्षि॑ । प्रे॑ति । ते । इ॒यमि॑ मन्म॒ भुवः॑ । यथा॑ । व॒न्द्यः । नः॑ ।

हवेषु । धन्वन् । इव । प्रपेति प्र – पा । असि । त्वम् । अग्ने ।

इयक्षवे ॥ पूरवे ॥ प्रत्न । राजन् । 73 (50)

2.5.12.5

वि पाजसा वि ज्योतिषा ।

स त्वमग्ने प्रतीकेन प्रत्योष यातुधान्यः । उरुक्षयेषु दीद्यत् ।

तञ् सुप्रतीकञ् सुदृशञ् स्वञ्चमविद्वाञ्सो विदुष्टरञ् सपेम ।

स यक्ष-द्विश्वा वयुनानि विद्वान् प्र हव्यमग्निरमृतेषु वोचत् ।

अञ्होमुचे विवेष यन्मा विन इन्द्रे न्द्र क्षत्र मिन्द्रियाणि

शतक्रतो ऽनु ते दायि । 74

2.5.12.5 - Padam

वीति । पाजसा । वीति । ज्योतिषा । सः । त्वम् । अग्ने । प्रतीकेन ।

प्रतीति । ओष । यातुधान्य इति यातु – धान्यः ।

उरुक्षयेष्वित्युरु – क्षयेषु । दीद्यत् । तम् । सुप्रतीकमिति

सु – प्रतीकम् । सुदृशमिति सु – दृशम् । स्वञ्चम् ।

अविद्वाञ्सः । विदुष्टरमिति विदुः – तरम् । सपेम । सः । यक्षत् ।

वि॒श्वा । व॒यु॒ना॒नि । वि॒द्वान् । प्रेति॑ । ह॒व्यम् । अ॒ग्निः । अ॒मृते॑षु ।
वो॒चत् । अ॒हो॒मुच॑ इत्य॒हः – मु॒चे । वि॒वेष॑ । यत् । मा । वी॒ति ।
नः । इन्द्र॑ । इन्द्र॑ । क्ष॒त्रम् । इन्द्रि॑याणि । श॒त॒क्र॒तो इति॑ श॒त॒क्र॒तो ।
अ॒न्वि॒ति । ते । दा॒यि । 74 (44)

(य॒ह्वीः स – म॒ध्व॒राय॑ नो – वरु॑ण॒ – राज॑ –
श्रु॑श्च श्रु॒त्वा रि॑श्च) (A12)

Prasna Korvai with starting Padams of 1 to 12 Anuvaakams :-

(वि॒श्वरू॑प – स्त्व॒ष्टे – न्द्रं॑ वृ॒त्रं – ब्र॒ह्म॒वा॒दि॒नः स त्वै –
नाऽसो॑मयाज्ये – ष वै दे॒वर॒थो – दे॒वा वै न॑र्चि ना – य॒ज्ञो –
ऽग्ने॑ म॒हान् – त्रीन् – नि॒वी॒त – मा॒यु॒ष्टे – द्वा॒द॒श)

Korvai with starting Padams of 1, 11, 21 Series of Panchaatis :-

(वि॒श्वरू॑पो – नैन॑ शी॒तरू॒रा – व॒द्य व॒सु – पू॒र्वेद्यु॑ – वा॒जा इत्य॑
– ग्ने॑ म॒हान् – नि॒वी॒त – म॒न्या य॒न्ति – च॒तुः स॒प्त॒तिः)

पद पाठे (वाक्य सहित) – द्वितीयकाण्डे – पञ्चमः प्रश्नः

First and Last Padam of Fifth Prasnam of Kandam 2:-

(वि॒श्वरूपो॒ – ऽनु ते॑ दा॒यि)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

द्वितीयकाण्डे पञ्चमः प्रश्नः समाप्तः ॥

Details of Panchati and Padam for Kandam 2 – Prasanam 5 – TS 2.5

	Panchati	Padams
Anuvakam 1	7	353
Anuvakam 2	7	354
Anuvakam 3	7	342
Anuvakam 4	5	230
Anuvakam 5	6	306
Anuvakam 6	6	307
Anuvakam 7	5	260
Anuvakam 8	7	329
Anuvakam 9	6	303
Anuvakam 10	4	197
Anuvakam 11	9	440
Anuvakam 12	5	244
Total →	74	3665

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in